

BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO UNUTRAŠNJIH POSLOVA
FEDERALNO MINISTARSTVO UNUTARNJIH POSLOVA
SARAJEVO

RADNA VERZIJA, PREDNACRT

**ZAKON
O PROMETU EKSPLOZIVNIH MATERIJ, A,
ZAPALJIVIH TEČNOSTI I GASOVA**

Sarajevo, august 2020.

ZAKON
O PROMETU EKSPLOZIVNIH MATERIJ
ZAPALJIVIH TEČNOSTI I GASOVA

I - OPŠTE ODREDBE

Član 1.
(Predmet Zakona)

Ovim zakonom uređuju se proizvodnja, promet i upotreba te skladištenje eksplozivnih materija i zapaljivih tečnosti i gasova, kao i druga pitanja koja se odnose na eksplozivne materije, zapaljive tečnosti i gasove.

Član 2.
(Preduzimanje sigurnosnih mjera)

Radi zaštite života, zdravlja i sigurnosti ljudi, materijalnih dobara i životne sredine, pravna lica, organi uprave i upravne organizacije te fizička lica koja dođu u dodir s eksplozivnim materijama, zapaljivim tečnostima i gasovima dužni su preduzimati sigurnosne mjere i radnje propisane ovim zakonom i podzakonskim propisima donesenim na osnovu ovog zakona, odnosno druge mjere i radnje koje su utvrđene drugim zakonima i podzakonskim propisima.

Član 3.
(Eksplozivne materije)

(1) Kao eksplozivne materije, u smislu ovog zakona, smatraju se:

- a) privredni eksploziv;
- b) sredstva za paljenje eksploziva;
- c) pirotehnički proizvodi;
- d) privredna municija;
- e) barut;
- f) proizvodi punjeni eksplozivnim materijama;
- g) sirovine eksplozivnog karaktera za proizvodnju materija iz tač. a) do f) ovog stava.

(2) Privrednim eksplozivima smatraju se materije koje se upotrebljavaju za rušenje ili oblikovanje objekta i materijala energijom oslobođenom hemijskim reakcijama eksplozivnog razlaganja.

(3) Sredstvima za paljenje eksploziva smatraju se sve vrste kapsula, upaljača i štapina i pirotehnička sredstva koja se upotrebljavaju pri miniranju.

(4) Pirotehničkim sredstvima smatraju se sredstva koja se upotrebljavaju za vatromete, protivgradne rakete i druge rakete koje se koriste za naučne, privredne i druge svrhe, kao i predmeti koji sadrže praskave sastojke koji služe za postizanje efekata vatre, svjetlosti, pucanja ili dima.

(5) Privrednom municijom smatraju se čahure opremljene kapsulom i napunjene barutom.

(6) Barutom se smatra crni i malodimni barut namijenjen za privredne (rudarske, građevinske i dr.) i sportske potrebe.

(7) Proizvodi punjeni eksplozivnim materijama su proizvodi koji su punjeni eksplozivima i/ili pirotehničkim smjesama, čiji efekat zavisi od tih materija.

(8) Sirovinama eksplozivnog karaktera smatraju se materije koje po hemijskom sastavu i osjetljivosti na paljenje imaju osobine eksploziva i sposobne su za eksplozivno razlaganje, a namijenjene su za proizvodnju eksplozivnih materija.

Član 4.

(Zapaljive tečnosti i gasovi)

(1) Zapaljive tečnosti ili smjese tečnosti su tečnosti bez ili sa suspendovanim ili rastvorenim materijama određene važećim standardima.

(2) Zapaljivi gasovi ili smjese zapaljivih gasova su materije koje se na temperaturi od 15 °C i pritisku od 1 bar nalaze u gasovitom stanju i koje u određenom odnosu sa zrakom mogu formirati eksplozivne smjese.

(3) Zapaljive tečnosti u smislu ovog zakona su tečnosti ili smjese tečnosti koje na temperaturi od 50 °C imaju pritisak pare niži od 300 kpa (3 bara), a tačku paljenja nižu od 100 °C.

(4) Zapaljive tečnosti opštepoznatih osobina su goriva za saobraćajna sredstva koja se prodaju na stanicama za snabdijevanje gorivom motornih vozila, ulja za loženje, industrijska otapala i zapaljive tečnosti za prehranu.

(5) Zapaljivi gasovi (zbijeni gasovi, gasovi pretvoreni u tečnost i gasovi rastvoreni pod pritiskom) su materije koje imaju kritičnu temperaturu nižu od 50 °C ili na 50 °C, pritisak pare viši od 300 kpa (3 bara).

(6) Zapaljivi gasovi opštepoznatih osobina su zemni gas i propan-butan gas.

Član 5.

(Značenje pojedinih izraza)

Pojedini izrazi upotrijebljeni u ovom zakonu imaju sljedeća značenja:

a) *proizvodnja eksplozivnih materija* predstavlja proces smještaja sirovina eksplozivnog karaktera, izradu, obradu ili preradu i skladištenje gotovih proizvoda eksplozivnih materija kod proizvođača;

b) *promet eksplozivnih materija* predstavlja nabavljanje, prodaju i upotrebu eksplozivnih materija, prevoz i smještaj eksplozivnih materija u skladišta, priručna skladišta i druge objekte;

c) *promet zapaljivim tečnostima i gasovima* predstavljaju radnje pretakanja, utovar ili istovar zapaljivih tečnosti i gasova u saobraćajna sredstva ili iz njih, rukovanje prilikom dopremanja, otpremanja i smještaja u skladišta, dopremanje i otpremanje pomoću naftovoda i gasovoda, prodaja i upotreba zapaljivih tečnosti i gasova;

ć) *upotreba eksplozivnih materija* predstavljala neposredno pripremanje za aktiviranje i aktiviranje eksplozivnih materija;

č) *distributer* je pravno lice u nabavnom lancu, a koje nije uvoznik ili proizvođač eksplozivnih materija, koje stavlja eksplozivne materije na raspolaganje tržištu;

d) *rukovanje eksplozivnim materijama* predstavlja radnje koje u toku provođenja procesa proizvodnje, ispitivanja, prometa i upotrebe eksplozivnih materija preduzimaju fizička lica koja ispunjavaju uvjete utvrđene ovim zakonom;

đ) *rukovodilac proizvodnje* je fizičko lice u pravnom licu koje u procesu proizvodnje eksplozivnih materija rukovodi i odgovara za odvijanje procesa u skladu s ovim zakonom;

dž) *rukovanje zapaljivim tečnostima i gasovima* podrazumijeva radnje koje prilikom skladištenja, držanja i prometa zapaljivih tečnosti i gasova obavljaju fizička lica koja ispunjavaju uvjete propisane ovim zakonom;

e) *odgovorno lice* je lice u pravnom licu kojem je s obzirom na njegovu funkciju ili na osnovu posebnog ovlaštenja povjeren određen obim poslova koji se odnose na primjenu ovog zakona i propisa donesenih na osnovu ovog zakona ili općeg akta pravnog lica u upravljanju ili rukovanju imovinom ili nekim drugim privrednim procesom ili na nadzor nad njim;

f) *reciklaža* predstavlja ponovnu upotrebu eksplozivnih materija u druge svrhe nakon uklanjanja eksplozivnih materija iz municije i minsko-eksplozivnih sredstava ili povrata eksplozivne materije, zbog tehničke neispravnosti ili isteka roka upotrebe, radi prerade za ponovnu upotrebu;

g) *neutralizacija* predstavlja hemijsku promjenu eksplozivnih materija u neeksplozivnu materiju;

h) *sigurnost* predstavlja mjere koje se preduzimaju u sprečavanju nesreća, a u slučaju neuspjeha, ublažavanje njihovih posljedica;

i) *uništavanje eksplozivnih materija* je proces koji predstavlja potpuno uništenje eksplozivnih materija sagorijevanjem, detonacijom ili drugim postupcima;

j) *skladištenje eksplozivnih materija* je smještaj i čuvanje eksplozivnih materija u proizvodnim i skladišnim objektima, priručnim skladištima i kontenjerima;

k) *ocjena usklađenosti* je postupak utvrđivanja ispunjavanja osnovnih sigurnosnih zahtjeva koji se odnose na eksplozivne materije za koji se izdaje dokument o ocjeni usklađenosti;

l) *oznaka CE* je oznaka kojom proizvođač označava da je eksplozivna materija u skladu sa važećim zahtjevima koji su utvrđeni u usklađenom zakonodavstvu Evropske unije kojom se predviđa njezino stavljanje na tržište;

lj) *javni vatromet* je istovremeno ili uzastopno aktiviranje pirotehničkih proizvoda koje izvodi pravno lice koje ima odobrenje za izvođenje javnog vatrometa izdato u skladu s odredbama ovog zakona;

nj) *glasni pucanj* je pucanj izazvan upotrebom eksplozivnih materija u raznim prilikama, za označavanje podneva, vjerskih i drugih manifestacija;

m) *pirotehnička sredstva* su sredstva koja sadrže eksplozivne materije ili eksplozivnu smjesu materija za stvaranje topline, svjetla, zvuka, plina ili dima, ili kombinaciju takvih učinaka kroz samostalne hemijske reakcije, a dijele se na kategoriju - razred I, II, III, IV, T1, T2, P1 i P2;

n) *skladište* je zatvorena prostorija a, izuzetno, natkriveni ili otvoreni prostor ako to vrsta eksplozivne materije ili klimatski uvjeti odgovaraju, u kojem se vrši sortiranje, pakovanje, smještaj, čuvanje i skladištenje eksplozivnih materija;

o) *priručno skladište* je prostorija izgrađena u skladu s aktom kojim se odobrava građenje ovakvog objekta i nalazi se u sklopu prodajnog objekta oružja i municije, odnosno prodajnog objekta pirotehničkih sredstava a služi za smještaj municije, baruta, pirotehničkih proizvoda i sporogorećih štapina, uz uvjet da ukupna količina smještene eksplozivne materije zajedno s barutom u municiji ne prelazi količinu od 20 kg ili 60 kg neto pirotehničke smjese;

p) *kontejner* je prenosno skladište eksplozivnih materija;

r) *skladište zapaljivih tečnosti i gasova* je objekat, dio objekta ili prostor u kojem se vrši skladištenje zapaljivih tečnosti i gasova;

s) *skladištenje zapaljivih tečnosti i gasova* je svako trajno ili privremeno čuvanje i odlaganje zapaljivih tečnosti i gasova u posudama i rezervoarima, čija je ukupna zapremina veća od 2.000 l zapaljivih tečnosti II i III grupe, odnosno 20 l lahkozapaljivih tečnosti I grupe ili veća od 30 kg zapaljivih gasova;

š) *držanje zapaljivih tečnosti i gasova* je čuvanje i odlaganje zapaljivih tečnosti i gasova u objektima, djelovima objekata ili izvan tih objekata u posudama čija ukupna zapremina ne prelazi 2.000 l zapaljivih tečnosti II i III grupe, odnosno 20 l lahkozapaljivih tečnosti I grupe i ne prelazi 30 kg zapaljivih gasova;

t) *objekat za zapaljive tečnosti i gasove* je građevinska, prostorna ili tehničko-tehnološka cjelina s instalacijama, postrojenjima i opremom (naftovodi, gasovodi, rezervoari, skladišta, pretakališta i dr.), odnosno same instalacije, postrojenja i oprema koji se ugrađuju u objekat ili samostalno izvide i namijenjeni su za skladištenje, držanje i promet zapaljivih tečnosti i gasova;

u) *rezervoar za zapaljive tečnosti i gasove* je stabilni, polustabilni ili prenosni zatvoreni sud koji se postavlja na posebno uređenu podlogu i služi za držanje zapaljive tečnost ili gasa zapremine veće od 250 l za zapaljivu tečnost, odnosno veće od 50 kg za zapaljivi gas;

v) *posuda za zapaljive tečnosti i gasove* je prenosni zatvoreni sud za držanje zapaljive tečnosti ili gasa zapremine do 250 l za zapaljive tečnosti, odnosno do 50 kg za zapaljive gasove;

z) *boca za zapaljive tečnosti i gasove* je zatvoreni sud cilindričnog oblika za držanje zapaljive tečnosti ili gasa koji se može upotrebljavati u domaćinstvu, industriji, laboratorijama ili u drugim slučajevima (boce za ronjenje i dr.);

ž) *bočica za zapaljive tečnosti i gasove* je zatvoreni sud za držanje zapaljive tečnosti ili gasa 0,2 l ili manje zapremine (lakovi, alkohol, plin za upaljače, sprejevi punjeni butanom ili propanom i dr.);

x) *objekat u kojem se vrši prodaja* je građevinski objekat, dio građevinskog objekta ili prostor koji je izgrađen, odnosno prilagođen za prodaju zapaljivih tečnosti i gasova u posudama, bocama i bočicama i eksplozivnih materija;

y) *zone opasnosti* su područja (površine zemljišta, vodene površine ili vazdušni prostor) na kojima se nalaze ili postoji mogućnost stvaranja zapaljive ili eksplozivne smjese pare tečnosti sa zrakom koja je sposobna za sagorijevanje;

q) *sigurnosna udaljenost* je rastojanje koje u slučaju požara ili eksplozije, u zavisnosti od vrste, zapremine i načina upotrebe zapaljivih tečnosti i gasova, vrste objekta i primijenjenih sigurnosnih mjera, osiguraju zaštitu okolnih objekata, dijelova objekata i životne sredine.

Član 6.

(Odredbe na koje se Zakon ne odnosi)

Odredbe ovog zakona ne primjenjuju se na:

- a) međunarodne vojne snage u Bosni i Hercegovini kada je to definisano međunarodnim sporazumima;
- b) smještaj eksplozivnih materija u jamskim objektima rudnika.

Član 7.

(Prevoz eksplozivnih materija zapaljivih tečnosti i gasova)

Prevoz (transport) eksplozivnih materija, zapaljivih tečnosti i gasova utvrđenih ovim zakonom vrši se u skladu sa posebnim propisom koji uređuje prevoz opasnih materija na području Federacije, osim ako ovim zakonom nije drugačije određeno.

Član 8.

(Gradnja, korištenje i održavanje objekata za proizvodnju, promet i upotrebu eksplozivnih materija te promet zapaljivim tečnostima i gasovima)

(1) Pravno lice koje se bavi proizvodnjom, prometom i upotrebom eksplozivnih materija te prometom zapaljivim tečnostima i gasovima u skladu s odredbama ovog zakona dužno je objekte koje će koristiti za te namjene graditi, koristiti i održavati u skladu sa Zakonom o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br.: 2/06, 72/07, 32/08, 4/10, 13/10 i 45/10) te u skladu odgovarajućim kantonalnim propisima koji regulišu gradnju i prostorno uređenje, osim ako je ovim zakonom drugačije određeno.

(2) Pravno lice iz stava (1) ovog člana dužno je pridržavati se odredbi Zakona o zaštiti prirode („Službene novine Federacije BiH“, broj 66/13) te odgovarajućih kantonalnih propisa koji regulišu zaštitu okoliša.

Član 9.

(Pravna lica koja mogu obavljati poslove proizvodnje, prometa i upotrebe eksplozivnih materija, zapaljivih tečnosti i gasova)

(1) Proizvodnju, promet i upotrebu eksplozivnih materija u skladu s odredbama ovog zakona mogu obavljati pravna lica koja su upisana u registar za obavljanje tih poslova kod nadležnog suda i koja imaju odobrenje za proizvodnju, promet, nabavku i upotrebu eksplozivnih materija koja su propisana ovim zakonom.

(2) Promet zapaljivim tečnostima i gasovima u skladu s odredbama ovog zakona mogu obavljati pravna lica koja su upisana u registar za obavljanje tih poslova kod nadležnog suda i koja ispunjavaju druge uvjete utvrđene ovim zakonom i drugim zakonima koje se odnose na zapaljive tečnosti i gasove.

Član 10.

(Pravno lice)

Pravno lice iz člana 9. ovog zakona u obavljanju poslova proizvodnje, prometa i upotrebe eksplozivnih materijama, zapaljivih tečnosti i gasova u skladu s odredbama ovog zakona pojavljuje se kao proizvođač, dobavljač, uvoznik, distributer, isporučilac, prodavac i korisnik eksplozivnih materija, odnosno zapaljivih tečnosti i gasova.

Član 11.

(Primjena Zakona o upravnom postupku)

Postupci koji se vode u skladu s ovim zakonom radi utvrđivanja činjenica ili drugih podataka koji se odnose na eksplozivne materije, zapaljive tečnosti i gasove i donošenja rješenja ili drugih akata predviđeni ovim zakonom provode se prema odredbama Zakona o upravnom postupku („Službene novine Federacije BiH“, br. 2/98 i 48/99), osim ako je ovim zakonom drugačije određeno.

Član 12.

(Gramatička terminologija)

Gramatička terminologija u vezi sa korištenjem muškog ili ženskog roda za pojmove u ovom zakonu uključuje oba roda.

II - ZAJEDNIČKE ODREDBE

Član 13.

(Rukovanje eksplozivnim materijama, zapaljivim tečnostima i gasovima)

(1) Rukovanje eksplozivnim materijama, zapaljivim tečnostima i gasovima u skladu s odredbama ovog zakona može da obavlja lice koje ispunjava sljedeće uvjete:

- a) da je državljanin Bosne i Hercegovine;
- b) da je starije od 18 godina ako obavlja poslove rukovanja zapaljivim tečnostima i gasovima, odnosno da je starije od 21 godine života ako obavlja poslove rukovanja eksplozivnim materijama;
- c) da nije osuđeno za krivično djelo, osim krivičnih djela protiv sigurnosti saobraćaja;
- d) da se protiv njega ne vodi krivični postupak;
- e) da u posljednje tri godine nije kažnjeno za prekršaj protiv javnog reda i mira s obilježljima nasilja;

(2) Lica koja obavljaju poslove proizvodnje, prometa i upotrebe eksplozivnih materija, zapaljivih tečnosti i gasova, pored uvjeta iz stava (1) ovog člana, potrebno je da ispunjavaju i posebne uvjete i to:

a) da su zdravstveno sposobna za obavljanje poslova rukovanja eksplozivnim materijama, zapaljivim tečnostima i gasovima i

b) da su stručno osposobljena za rukovanje eksplozivnim materijama u toku obavljanja poslova proizvodnje, prometa i upotrebe eksplozivnih materija, odnosno rukovanje zapaljivim tečnostima i gasovima.

(3) Federalni ministar unutrašnjih poslova (u daljnjem tekstu: federalni ministar) će propisati uvjete u pogledu stručne spremlje koja je potrebna za lica koja rukuju eksplozivnim materijama, zapaljivim tečnostima i gasovima, ovisno o vrsti poslova i odgovornosti koje imaju u procesu rukovanja eksplozivnim materijama, zapaljivim tečnostima i gasovima, način i postupak provjere stručnog znanja za ta lica u obavljanju poslova proizvodnje, ispitivanja, prometa, utovara i istovara, uskladištenja, čuvanja, nabavke i prodaje te druga pitanja koja se odnose na stručno osposobljavanje i usavršavanje lica koja u svome radu rukuju eksplozivnim materijama, zapaljivim tečnostima i gasovima.

(4) Federalni ministar će u saradnji sa federalnim ministrom zdravstva propisati kriterije zdravstvene sposobnosti za lica koja rukuju eksplozivnim materijama i zapaljivim tečnostima i gasovima te druga pitanja koja se odnose na zdravstvenu sposobnost tih lica.

Član 14.

(Odgovorno lice za proizvodnju i držanje eksplozivnih materija, zapaljivih tečnosti i gasova)

(1) Pravno lice koje se bavi proizvodnjom, prometom i upotrebom eksplozivnih materija, zapaljivih tečnosti i gasova, u skladu s odredbama ovog zakona, dužno je odrediti odgovorno lice koji će pratiti proces proizvodnje, prometa i upotrebe eksplozivnih materija, zapaljivih tečnosti i gasova a koje je u radnom odnosu u tom pravnom licu.

(2) Odgovorno lice iz stava (1) ovog člana, pored uvjeta iz člana 13. st. (1) i (2) ovog zakona, mora imati VSS, odnosno visoko obrazovanje prvog ciklusa (koji se vrednuje sa 240 ECTS bodova) ili drugog ili trećeg ciklusa Bolonjskog sistema studiranja, diplomu visokog obrazovanja te položen stručni ispit za odgovorno lice i namjanje tri godine radnog iskustva na poslovima proizvodnje, prometa i upotrebe eksplozivnih sredstava, zapaljivih tečnosti i gasova.

(3) Izuzetno, od odredbe stava (2) ovog člana, poslove odgovornog lica na stanicama za snabdijevanje gorivom motornih vozila mogu obavljati lica koja imaju III ili IV stepen školske spreme te položen stručni ispit i namjanje tri godine radnog iskustva na poslovima proizvodnje, prometa i upotrebe eksplozivnih sredstava, zapaljivih tečnosti i gasova.

(4) Federalni ministar će utvrditi sadržaj ispita iz stava (2) ovog člana, način i postupak polaganja tog ispita i druga pitanja koja se odnose na taj ispit.

Član 15.

(Stručno osposobljavanje i usavršavanje)

(1) Pravno lice iz člana 9. ovog zakona dužno je osigurati kontinuirano stručno osposobljavanje i usvršavanje za lica iz čl. 13. i 14. ovog zakona koja u tom pravnom licu obavljaju poslove rukovanja eksplozivnim materijama, zapaljivim tečnostima i gasovima, prema planu i programu koji donosi federalni ministar, a što će se bliže urediti propisom iz člana 13. stav (3) ovog zakona.

(2) Stručno osposobljavanje i usavršavanje iz stava (1) ovog člana obavlja pravno lice koje ovlasti kantonalno ministarstvo unutrašnjih poslova (u daljnjem tekstu: kantonalno ministarstvo).

(3) Uvjeti koje pravno lice iz stava (2) ovog člana treba ispunjavati za provođenje stručnog osposobljavanja i usavršavanja te druga pitanja koja se odnose na stručno osposobljavanje i usavršavanje tih lica bit će uređena propisom iz člana 13. stav (3) ovog zakona.

Član 16.

(Mjesta na kojima se mogu graditi objekti za proizvodnju i držanje eksplozivnih materija, zapaljivih tečnosti i gasova)

(1) Objekti u kojima se proizvode eksplozivne materije, kao i objekti u kojima se proizvode ili drže zapaljive tečnosti i gasovi, mogu se izgraditi samo na mjestu koje je dovoljno udaljeno od naseljenih mjesta, javnih puteva, željezničkih pruga, dalekovoda visokog napona i drugih važnih objekata koje bi mogle ugrožavati ili moraju od tih objekata biti odvojeni zaštitnim gromobranom ili zidom koji pruža punu zaštitu od eksplozije i požara.

(2) U zonama u kojima se ugrožavaju objekti iz stava (1) ovog člana ne može se odobriti izgradnja drugih objekata, osim onih koji služe za sigurnost tog objekta.

Član 17.

(Dužnost vezano za preduzimanje preventivnih i drugih mjera u toku obavljanja poslova u vezi s eksplozivnim materijama, zapaljivim tečnostima i gasovima)

(1) Pravna lica dužna su da u toku proizvodnje, prometa, ispitivanja, upotrebe, skladištenja i uništavanja eksplozivnih materija vode brigu o zaštiti života, zdravlja i sigurnosti ljudi, materijalnih dobara i čovjekove sredine i provode sve preventivne i druge mjere utvrđene ovim zakonom i propisima koji se donose na osnovu ovog zakona, propisima o zaštiti na radu, zaštiti od požara, zdravstvenoj zaštiti, zaštiti životne sredine i propisima o građenju te da organizuju i trajno obavljaju kontrolu provođenja propisanih uvjeta i mjera za proizvodnju i rukovanje tim materijama.

(2) Kontrolu, iz stava (1) ovog člana, dužna su organizovati te provoditi i pravna lica koja se bave proizvodnjom zapaljivih tečnosti i gasova ili njihovim skladištenjem, kao i pravna lica koja nabavljaju, drže i u obavljanju svoje djelatnosti koriste zapaljive tečnosti ili gasove.

(3) Pravna lica iz st. (1) i (2) ovog člana, kao i pravna lica koja se bave nabavkom i prodajom eksplozivnih materija, dužna su da svojim općim aktom bliže utvrde mjere, radnje te ponašanje radnika radi potpunog osiguranja od eksplozije, požara i moguće njihove zloupotrebe.

Član 18.

(Ambalaža i pakovanje eksplozivnih materija i zapaljivih tečnosti i gasova)

(1) Pakovanje eksplozivnih materija i zapaljivih tečnosti i gasova vrši se u skladu sa propisanim tehničkim normama i međunarodnim standardima i preporukama utvrđenim u propisima o prevozu opasnih materija.

(2) Ambalaža i paketi, kao i svako pojedinačno pakovanje eksplozivnih materija i zapaljivih tečnosti i gasova mora imati posebne oznake radi identifikacije i to: oznaku serije, serijski broj i godinu proizvodnje.

(3) Uz svaku ambalažu i pakovanje iz stava (2) ovog člana mora biti priloženo

uputstvo za sigurnu upotrebu i način uništavanja eksplozivne materije i zapaljive tečnosti te gasova i ambalaže.

(4) Pravno lice koje je upotrijebilo eksplozivnu materiju i zapaljive tečnosti te gasove dužno je zbrinuti ambalažu u kojoj su se nalazile eksplozivne materije i zapaljive tečnosti i gasovi u skladu s uputstvom proizvođača ili uputstvom pravnog lica od kojeg su nabavili eksplozivne materije, odnosno zapaljive tečnosti i gasove.

(5) Ambalaža koja je namijenjena za pakovanje eksplozivnih materija, zapaljivih tečnosti i gasova ne smije se koristiti u druge svrhe, osim u svrhu pakovanja onih eksplozivnih materija, zapaljivih tečnosti i gasova za koje je ambalaža namijenjena.

(6) Eksplozivne materije mogu se prevoziti, stavljati u promet i upotrebljavati samo u izvornoj ambalaži, koja je ispitana i označena u skladu s odredbama ovog zakona i propisa iz člana 31. stav (5) ovog zakona.

(7) Pored podataka iz stava (6) ovog člana, na ambalaži se moraju nalaziti i podaci o datumu proizvodnje i rok upotrebe eksplozivne materije, uputstvo za upotrebu, posebno upozorenje, ako ga ima, i oznaka razreda za pirotehničko sredstvo.

(8) Pravno lice može, radi promovisanja ambalaže, da ambalažu koju koristi za eksplozivne materije, zapaljive tečnosti i gasove izloži na sajmovima, izložbama i prodajnim mjestima.

Član 19.

(Sigurnosni plan postupanja u vezi s nastankom nesreća ili drugih vanrednih događaja)

(1) Pravno lice je dužno izraditi sigurnosni plan u vezi s nastankom nesreća i ili drugih vanrednih događaja (eksplozija, požar, krađa i sl.).

(2) Pravno lice dužno je upoznati sva lica koja za njega obavljaju radnje s eksplozivnim materijama, zapaljivim tečnostima i gasovima sa mjerama određenim u općim aktima iz člana 17. stav (3) ovog zakona i mjerama utvrđenim u planu iz stava (1) ovog člana te ih osposobiti za postupanje u slučaju nastanka nesreće ili drugih vanrednih događaja, što će biti bliže uređeno propisom iz člana 13. stav (3) ovog zakona.

(3) Vlada Federacije Bosne i Hercegovine (u daljnjem tekstu: Vlada Federacije) donijet će propis o zaštiti na radu pri proizvodnji i rukovanju eksplozivnim materijama, zapaljivim tečnostima i gasovima na prijedlog federalnog ministra energije, rudarstva i industrije i federalnog ministra.

Član 20.

(Mjere zaštite ljudi i imovine)

Na mjestima na kojima se obavlja proizvodnja, promet, upotreba i skladištenje eksplozivnih materija, zapaljivih tečnosti i gasova obavezno se provode mjere zaštite tih mjesta u skladu sa Zakonom o agencijama i unutrašnjim službama za zaštitu ljudi

i imovine („Službene novine Federacije BiH“, br. 78/08 i 67/13).

Član 21.

(Obavješćavanje kantonalnog ministarstva - policijske uprave ili policijske stanice o krađi ili gubitku eksplozivnih materija, zapaljivih tečnosti i gasova)

Pravno lice koji se bavi proizvodnjom, prometom, ispitivanjem ili upotrebom eksplozivnih materija, odnosno zapaljivih tečnosti i gasova ili u te svrhe skladištenjem eksplozivnih materija, zapaljivih tečnosti i gasova, obavezno je obavijestiti najbližu policijsku upravu ili policijsku stanicu kantonalnog ministarstva odmah po saznanju o gubitku, nestanku ili krađi eksplozivnih materija, zapaljivih tečnosti i gasova.

Član 22.

(Obavješćavanje o početku ili prestanku ili promjenama djelatnosti)

Pravno lice dužno je obavijestiti Federalno ministarstvo, odnosno kantonalno ministarstvo koje je u skladu s odredbama ovog zakona izdalo odobrenje za proizvodnju, promet i upotrebu eksplozivnih materija, zapaljivih tečnosti i gasova i drugu vrstu odobrenja, odnosno saglasnosti koje je utvrđeno ovim zakonom, o početku ili prestanku djelatnosti, statusnim promjenama i promjenama uvjeta potrebnih za obavljanje djelatnosti tog pravnog lica u roku od osam dana od dana nastanka tih promjena.

Član 23.

(Postupanje u vezi s novim činjenicama nastalim u postupku izdavanja ili nakon izdavanja odobrenja, odnosno saglasnosti koji se odnose na proizvodnju, promet i upotrebu eksplozivnih materija, zapaljivih tečnosti i gasova)

(1) Ako se u toku postupka izdavanja ili nakon izdatog odobrenja, odnosno saglasnosti za obavljanje poslova proizvodnje, prometa i upotrebe eksplozivnih materija, zapaljivih tečnosti i gasova, utvrde nove činjenice koje predstavljaju opasnost po život i zdravlje ljudi i njihove imovine te javne sigurnosti i životne sredine i koje se ne mogu otkloniti drugim sredstvima, Federalno ministarstvo, odnosno kantonalno ministarstvo može zatražiti dodatne dokaze, odnosno naložiti dodatne mjere sigurnosti ili ukinuti izdato odobrenje.

(2) Federalni ministar na prijedlog kantonalnog ministra može iz sigurnosnih razloga zabraniti prodaju ili upotrebu pojedinih eksplozivnih materija, a koja se saopćava putem sredstava javnog informisanja i objavljuje u „Službenim novinama Federacije BiH“.

III - NADLEŽNOST U PROVOĐENJU POSLOVA KOJI SE ODOSE NA EKSPLOZIVNE MATERIJU I ZAPALJIVE TEČNOSTI I GASOVE

Član 24.

*(Provođenje, praćenje i stručna obrada dokumenata i drugih akata
iz oblasti eksplozivnih materija, zapaljivih tečnosti i gasova)*

Radi zaštite života, zdravlja i sigurnosti ljudi, materijalnih dobara i čovjekove sredine, u toku proizvodnje, prometa i upotrebe eksplozivnih materija i zapaljivih tečnosti i gasova, u skladu s odredbama ovog zakona, Federalno ministarstvo, kantonalno ministarstvo i drugi organi uprave i pravna lica donose akte i preduzimaju druge radnje na način utvrđen u čl. 25. do 29. ovog zakona i drugim odredbama ovog zakona i podzakonskim propisima donesenim na osnovu ovog zakona, kako bi se osiguralo pravilno i zakonito korištenje eksplozivnih materija i zapaljivih tečnosti i gasova.

Član 25.

(Poslovi iz nadležnosti Federalnog ministarstva)

Federalno ministarstvo iz oblasti eksplozivnih materija i zapaljivih tečnosti i gasova na nivou Federacije obavlja sljedeće poslove:

- a) provodi postupke u vezi s izdavanjem odobrenja za stavljanje u promet, proizvodnju, istraživanje i prevoz eksplozivne materije;
- b) organizuje provođenje stručnog ispita za odgovorno lice i polaganje ispita za минера;
- c) daje mišljenja na nacrt planskog dokumenta za skladišta i objekte u kojima se obavlja promet zapaljivih tečnosti i gasova iz nadležnosti Federalnog ministarstva;
- ć) učestvuje u tehničkom pregledu skladišta zapaljivih tečnosti i gasova iz nadležnosti Federalnog ministarstva;
- c) rješava po žalbi na rješenja koja donosi prvostepeni organ;
- ć) organizuje i provodi poslove inspekcijskog nadzora iz nadležnosti Federalnog ministarstva;
- č) daje stručna mišljenja u vezi sa provođenjem zakona i podzakonskih propisa donesenih na osnovu zakona;
- e) obavlja i druge poslove iz oblasti eksplozivnih materija i zapaljivih tečnosti i gasova koji su ovim zakonom i podzakonskim propisima stavljeni u nadležnosti Federalnog ministarstva.

Član 26.

(Poslovi iz nadležnosti kantonalnih ministarstava)

(1) Kantonalno ministarstvo iz oblasti eksplozivnih materija, zapaljivih tečnosti i gasova na nivou kantona obavlja sljedeće poslove:

a) provodi postupke u vezi s izdavanjem odobrenja za nabavku, upotrebu, prijevoz eksplozivnih materija i mjesta za postavljanje privremenog skladišta eksplozivnih materija i druga odobrenja predviđena ovim zakonom;

b) obavlja poslove izdavanja ovlaštenja pravnim licima za provođenje stručnog osposobljavanja i usavršavanja rukovanja eksplozivnim materijama, zapaljivim tečnostima i gasovima;

c) određuje lokacije za uništavanje eksplozivne materije;

ć) provodi postupak u vezi s izdavanjem saglasnosti za lokaciju skladišta za eksplozivne materije;

č) učestvuje u tehničkom pregledu skladišta eksplozivnih materija, zapaljivih tečnosti i gasova iz nadležnosti kantonalnog ministarstva;

d) provodi postupke u vezi s izdavanjem saglasnosti za postavljanje i upotrebu postrojenja i uređaja za korištenje zapaljivih tečnosti i gasova;

đ) daje mišljenja na nacrt planskog dokumenta za skladišta i objekte u kojima se obavlja promet zapaljivih tečnosti i gasova iz nadležnosti kantonalnog ministarstva;

dž) provodi postupke u vezi s izdavanjem saglasnosti za lokaciju objekta i tehničke dokumentacije za izgradnju i rekonstrukciju skladišta i objekata za promet zapaljivih tečnosti i gasova;

e) poslove inspekcijskog nadzora iz nadležnosti kantonalnog ministarstva;

f) obavlja i druge poslove iz oblasti zaštite eksplozivnih materija, zapaljivih tečnosti i gasova koji su ovim zakonom i podzakonskim propisima stavljeni u nadležnost kantonalnog ministarstva.

(2) Poslovi izdavanja odobrenja za izvođenje javnog vatrometa i glasnog pucnja izvršavaju se u okviru policijskih uprava, odnosno policijskih stanica, kao organizacionih jedinica kantonalnog ministarstva.

Član 27.

(Poslovi iz nadležnosti organa uprave Bosne i Hercegovine)

Nadležni organ Bosne i Hercegovine iz oblasti eksplozivnih materija, zapaljivih tečnosti i gasova na nivou Federacije obavlja sljedeće poslove:

a) provodi postupke u vezi s izdavanjem odobrenja pravnom licu za ispitivanje eksplozivnih materija;

b) donosi tehničke propise i standarde koji se odnose na eksplozivne materije zapaljive tečnosti i gasove;

c) daje stručna mišljenja u vezi sa provođenjem tehničkih propisa i standarda;

ć) obavlja i druge poslove iz oblasti eksplozivnih materija, zapaljivih tečnosti i gasova koji su ovim zakonom stavljeni u nadležnost organa uprave Bosne i Hercegovine.

Član 28.

(Poslovi iz nadležnosti drugih pravnih lica)

Poslovi iz oblasti eksplozivnih materija i zapaljivih tečnosti i gasova koji su utvrđeni ovim zakonom organizuju se u okviru pravnog lica koje ima ovlaštenje izdato od organa uprave u skladu s ovim zakonom i to:

- a) poslovi ispitivanja eksplozivnih materija;
- b) postupak ocjenjivanja usklađenosti eksplozivnih materija sa tehničkim zahtjevima;
- c) stručno osposobljavanje i usavršavanje rukovanja eksplozivnih materija, zapaljivih tečnosti i gasova te
- ć) drugi poslovi koji su ovim zakonom i podzakonskim propisima stavljeni u nadležnost tih pravnih lica.

IV - EKSPLOZIVNE MATERIJE

1. Ispitivanje eksplozivnih materija

Član 29.

(Ovlaštenje za obavljanje poslova ispitivanja eksplozivne materije)

(1) Prije izdavanja odobrenja za stavljanje u promet eksplozivne materije koja je proizvedena na području Federacije, ta materija se ispituje.

(2) Ispitivanje eksplozivne materije iz stava (1) ovog člana može obavljati pravno lice koje ovlasti nadležno ministarstvo Bosne i Hercegovine u skladu sa propisima kojima se uređuju tehnički zahtjevi za proizvode i ocjenjivanje usaglašenosti proizvoda sa propisanim zahtjevima.

(3) Troškove ispitivanja eksplozivne materije snosi pravno lice koje traži odobrenje za stavljanje u promet eksplozivne materije.

Član 30.

(Ispitivanje u svrhu vlastite proizvodnje i otpočinjanja serijske proizvodnje eksplozivne materije)

(1) Pravno lice koje ima odobrenje za proizvodnju eksplozivne materije može ispitivati eksplozivne materije u svrhu kontrole vlastite proizvodnje bez ovlaštenja iz člana 29. stav (2) ovog zakona.

(2) Prije otpočinjanja serijske proizvodnje, pravno lice je dužno da proizvede određenu količinu eksplozivne materije radi njenog ispitivanja u skladu sa članom 29. ovog zakona, a u svrhu stavljanja u promet i upotrebu.

2. Tehnički zahtjevi i postupci ocjenjivanja usklađenosti

Član 31.

(Stavljanje na tržište i upotrebu eksplozivne materije)

(1) Eksplozivna materija može biti stavljena na tržište u promet i upotrebu samo ako ima odobrenje za stavljanje u promet eksplozivne materije, koje izdaje Federalno ministarstvo na zahtjev proizvođača ili dobavljača eksplozivne materije.

(2) Uz zahtjev iz stava (1) ovog člana, potrebno je priložiti sljedeće:

- a) dokument o usaglašenosti sa tehničkim zahtjevima;
- b) uputstvo za upotrebu, skladištenje i uništavanje eksplozivnih materija i ambalaže;
- c) podatak o načinu označavanja eksplozivne materije.

(3) Dokument, uputstvo i podaci iz stava (2) ovog člana moraju biti napisani na jednom od službenih jezika u Federaciji Bosne i Hercegovine (u daljnjem tekstu: Federacija) i na latiničnom ili ćiriličnom pismu.

(4) Na osnovu odobrenja iz stava (1) ovog člana Federalno ministarstvo sačinjava listu eksplozivnih materija koje se mogu staviti u promet i ta lista će se objaviti u „Službenim novinama Federacije BiH“.

(5) Federalni ministar će propisati način i postupak označavanja eksplozivne materije iz stava (2) tačka c) ovog člana.

Član 32.

(Postupak ocjenjivanja usaglašenosti)

(1) Usaglašenost eksplozivnih materija sa tehničkim zahtjevima u postupku ocjenjivanja usaglašenosti osigurava se provođenjem jedne od sljedećih radnji i to:

a) početnim ispitivanjem tipa proizvoda (postupak B) od pravnog lica ovlaštenog za ocjenjivanje usaglašenosti i, po izboru proizvođača, provjerom usaglašenosti sa tipom proizvoda (provjera tipa);

- ispitivanjem slučajnih uzoraka proizvoda (postupak C) od pravnog lica ovlaštenog za ocjenjivanje usaglašenosti sa certifikovanim tipom proizvoda (usaglašenost sa tipom);

- osiguranje kvaliteta proizvodnje putem ocjenjivanja sistema kvaliteta, uz kontrolu pravnog lica (ovlaštenog za ocjenjivanje usaglašenosti (postupak D);

- osiguranje kvaliteta proizvodnje putem ocjenjivanja sistema kvaliteta, uz nadzor pravnog lica ovlaštenog za ocjenjivanje usaglašenosti (postupak E);

- pregledom i ispitivanjem svakog proizvoda (verifikacija proizvoda) od pravnog lica ovlaštenog za ocjenjivanje usaglašenosti (postupak F);

b) pregledom i ispitivanjem usaglašenosti svakog proizvoda sa tehničkim zahtjevima (pojedinačna verifikacija) od pravnog lica ovlaštenog za ocjenjivanje usaglašenosti (postupak G).

c) usaglašenost koja se zasniva na potpunom osiguranje kvaliteta (postupak H) – odnosi se samo na pirotehnička sredstva.

(2) Poslove iz stava (1) ovog člana može obavljati pravno lice iz člana 29. ovog zakona.

(3) Federalni ministar će propisati tehničke zahtjeve i postupke za ocjenjivanje usaglašenosti eksplozivnih materija te druga pitanja koja se odnose na ocjenu usaglašenosti eksplozivnih materija.

Član 33.

*(Isprave i oznake usaglašenosti eksplozivnih materija
izdate od drugih država)*

(1) Isprave i oznake o usaglašenosti eksplozivnih materija koje su izdate u drugim državama važe na području Federacije ako nadležno ministarstvo iz člana 29. ovog zakona procijeni da su primijenjeni postupci ocjene usaglašenosti u dovoljnom stepenu usaglašenosti s ekvivalentnim tehničkim propisima koji se primjenjuju u Bosni Hercegovini.

(2) Priznavanje isprava i oznaka usaglašenosti eksplozivnih materija koji su izdati u drugoj državi obavlja se u skladu sa propisom kojim se uređuju tehnički zahtjevi za proizvode i ocjenjivanje usaglašenosti.

Član 34.

*(Uzimanje uzoraka eksplozivnih materija radi
provjeravanja usaglašenosti)*

(1) Federalno ministarstvo samostalno ili na prijedlog kantonalnog ministarstva može uzimati uzorke eksplozivnih materija koje su u prometu radi provjeravanja usaglašenost koju obavlja pravno lice iz člana 29. stav (2) ovog zakona.

(2) Federalno ministarstvo će privremeno zabraniti promet eksplozivnih materija do utvrđivanja usaglašenosti ako postoji sumnja da bi daljnji promet eksplozivne materije mogao ugroziti život i zdravlje ljudi, njihovu imovinu i životnu sredinu.

(3) Federalno ministarstvo će zabraniti promet eksplozivnih materija iz stava (2) ovog člana ako uzeti uzorak ne odgovara propisanim tehničkim zahtjevima, s tim da je proizvođač ili dobavljač dužan u roku od 30 dana od dana prijema obavijestiti da eksplozivne materije ne odgovaraju propisanim tehničkim zahtjevima te će ih uništiti ili vratiti proizvođaču o vlastitom trošku.

(4) Troškove provjere usaglašenosti snosi proizvođač, odnosno dobavljač, ako se utvrdi da uzorak ne odgovara propisanim tehničkim zahtjevima, odnosno Federalno ministarstvo ako uzorak odgovara propisanim tehničkim zahtjevima.

3. Proizvodnja eksplozivnih materija

Član 35.

(Uvjeti za proizvodnju eksplozivnih materija)

(1) Proizvodnjom eksplozivnih materija mogu se baviti samo pravna lica koja su registrovana za obavljanje te djelatnosti kod nadležnog suda i koja za obavljanje poslova proizvodnje eksplozivne materije dobiju posebno odobrenje od Federalnog ministarstva koje se može odnositi na stacionarnu proizvodnju ili odobrenje za proizvodnu eksplozivne materije na mjestu upotrebe, a koje se izdaje u skladu sa čl. 37. i 38. ovog zakona.

(2) Pravno lice ne smije započinjati proizvodnju eksplozivnih materija prije dobijanja odobrenja iz stava (1) ovog člana.

(3) Pravno lice može se baviti proizvodnjom eksplozivnih materija u građevinskim objektima (stacionarska proizvodnja) i na radilištu (proizvodnja na mjestu upotrebe). Proizvodnju eksplozivnih materija u građevinskim objektima ili na radilištu pravno lice može obavljati tek kada dobije odobrenje iz stava (1) ovog člana.

(4) Odobrenje iz stava (1) ovog člana može biti vremenski ograničeno te sadržavati dodatne mjere ako Federalno ministarstvo utvrdi da su neophodne za zaštitu života i zdravlja ljudi, njihove imovine i zaštite životne sredine.

Član 36.

(Zabrana proizvodnje eksplozivnih materija za pojedinca)

Zabranjena je proizvodnja eksplozivne materije pojedincima, kao i stavljanje u promet eksplozivne materije.

Član 37.

(Odobrenje za stacionarnu proizvodnju)

(1) Odobrenja iz člana 35. stav (1) ovog zakona za stacionarnu proizvodnju izdaje se na pismeni zahtjev pravnog lica, uz koji se prilaže sljedeće:

a) dokaz o upisu djelatnosti proizvodnje eksplozivnih materija u sudski registar;

b) dokaz o ispunjavanju uvjeta u pogledu poslovnih prostorija;

c) podaci o odgovornim licima u pravnom licu (ime i prezime, datum i mjesto rođenja, JMB, adresa prebivališta);

ć) spisak lica koja rukuju eksplozivnim materijama u procesu proizvodnje sa podacima (ime i prezime, datum i mjesto rođenja, JMB, adresa prebivališta, naziv radnog mjesta);

č) za odgovorna lica dokazi o ispunjavanju uvjeta iz člana 14. ovog zakona;

d) za lica koje rukuje eksplozivnim materijama (rukovodilac proizvodnje, lica

koja rade u procesu proizvodnje, lica koja rukuju eksplozivnim materijama pri skladištenju) dokazi o ispunjavanju uvjeta iz člana 13. stav (1) tač. (d) i (e) ovog zakona;

dž) dokaz o ispunjavanju uvjeta za skladištenje eksplozivnih materija;

đ) upotrebna dozvola za skladište eksplozivnih materija (uz upotrebnu dozvolu izdatu prije 1996. godine obavezno se prilaže okolinska dozvola);

e) podaci o vrstama eksplozivnih materija koje će se proizvoditi;

f) elaborat - tehnološki postupak proizvodnje eksplozivnih materija;

g) pravilnik o zaštiti na radu;

h) pravilnik o zaštiti od požara;

i) plan sigurnosti u slučaju nesreće ili drugih vanrednih događaja (eksplozija, požar, krađa, vremenske nepogode i sl.);

j) upotrebna dozvola za objekat u kojem će se obavljati proizvodnja eksplozivnih materija (za proizvodnju u stacionarnom pogonu);

k) dokaz da je ispitana ambalaža koja će se koristiti za pakovanje eksplozivnih materija;

l) opis sistema vlastite kontrole kvaliteta u toku procesa proizvodnje.

(2) Odobrenje iz stava (1) ovog člana donosi se u vidu rješenja, na koje se ne može izjaviti žalba, ali se može pokrenuti upravni spor kod nadležnog kantonalnog suda.

(3) Federalno ministarstvo donosi rješenje o ukidanju odobrenja za stacionarnu proizvodnju eksplozivne materije na zahtjev proizvođača ili ako proizvođač prestane da ispunjava uvjete iz stava (1) ovog člana, na koje se ne može izjaviti žalba, ali se može pokrenuti upravni spor kod nadležnog kantonalnog suda.

(4) Pravno lice je dužno u roku od osam dana od dana prijema rješenja o ukidanju odobrenja za proizvodnju eksplozivnih materija sve evidencije koje je vodilo prema ovom zakonu dostaviti Federalnom ministarstvu.

(5) Federalni ministar će propisati uvjete koje moraju ispunjavati poslovne prostorije i objekti za skladištenje eksplozivnih materija te duga pitanja koja se odnose na poslovne prostorije i skladištenje eksplozivnih materija.

Član 38.

(Odobrenje za proizvodnju eksplozivnih materija na mjestu upotrebe)

(1) Za izdavanje odobrenja za proizvodnju eksplozivnih materija na mjestu upotrebe pravno lice uz pismeni zahtjev prilaže sljedeće:

a) dokaz o upisu djelatnosti proizvodnje eksplozivnih materija u sudski registar;

b) dokaz o ispunjavanju uvjeta u pogledu poslovnih prostorija i skladištenja

eksplozivnih materija u skladu sa propisom iz člana 37. stav (5) ovog zakona;

c) podaci o odgovornim licima u pravnom licu (ime i prezime, datum i mjesto rođenja, JMB, adresa prebivališta);

ć) spisak lica koja rukuju eksplozivnim materijama u procesu proizvodnje sa podacima (ime i prezime, datum i mjesto rođenja, JMB, adresa prebivališta, naziv radnog mjesta);

č) za odgovorna lica dokazi o ispunjavanju uvjeta iz člana 14. ovog zakona;

d) za lica koje rukuje eksplozivnim materijama (rukovodilac proizvodnje, lica koja rade u procesu proizvodnje, lica koja rukuju eksplozivnim materijama pri skladištenju) dokazi o ispunjavanju uvjeta iz člana 13. ovog zakona;

đ) upotrebna dozvola za postrojenje na kojem se vrši proizvodnja eksplozivne materije;

dž) upotrebna dozvola za skladišta eksplozivnih materija (uz upotrebnu dozvolu izdatu prije 1996. godine obavezno se prilaže okolinska dozvola);

e) podaci o vrstama eksplozivnih materija koje će se proizvoditi;

f) elaborat - tehnološki postupak proizvodnje eksplozivnih materija;

g) pravilnik o zaštiti na radu;

h) pravilnik o zaštiti od požara;

i) plan postupanja u slučaju nesreće ili drugih vanrednih događaja (eksplozija, požar, krađa, vremenske nepogode i sl.);

j) podaci o lokacijama na kojima će se proizvoditi eksplozivne materije - mjesto predviđeno za proizvodnju eksplozivne materije, o periodu u kojem bi se obavljala proizvodnja i dr. (za proizvodnju na lokaciji radilišta);

k) podaci o specijalizovanoj opremi za proizvodnju eksplozivnih materija na mjestu upotrebe (specijalizovano vozilo, mikser i dr.);

l) opis sistema vlastite kontrole kvaliteta u toku procesa proizvodnje;

lj) razlog zbog čega se na mjestu upotrebe proizvode eksplozivne materije.

(2) Odobrenje iz stava (1) ovog člana donosi se u vidu rješenja, na koje se ne može izjaviti žalba, ali se može pokrenuti upravni spor kod nadležnog kantonalnog suda.

(3) Federalno ministarstvo donosi rješenje o ukidanju odobrenja za proizvodnju eksplozivnih materija na mjestu upotrebe na zahtjev proizvođača ili ako proizvođač prestane da ispunjava uvjete iz stava (1) ovog člana, na koje se ne može izjaviti žalba, ali se može pokrenuti upravni spor.

(4) Pravno lice je dužno u roku od osam dana od dana prijema rješenja o ukidanju odobrenja za proizvodnju eksplozivnih materija sve evidencije koje je vodio prema ovom zakonu dostaviti Federalnom ministarstvu.

Član 39.

(Upotreba eksplozivne materije koja se proizvodi na lokaciji radilišta)

(1) Zabranjena je upotreba eksploziva koji se proizvodi na mjestu upotrebe na lokaciji radilišta, izvan lokacije na kojoj se proizvodi.

(2) Pravno lice je dužno da proizvedenu eksplozivnu materiju na mjestu upotrebe trenutno i neposredno upotrijebi sipanjem unaprijed pripremljene minske bušotine na mjestu upotrebe, odnosno lokaciji radilišta.

(3) Pravno lice ne može da pakuje i skladišti eksplozivnu materiju koju je proizvelo na mjestu upotrebe.

Član 40.

(Eksplozivne materije koje se mogu proizvoditi na mjestu upotrebe)

Pravno lice na mjestu upotrebe, odnosno na lokaciji radilišta, može da proizvodi sljedeće eksplozivne materije i to:

a) amonij nitrat trenutno i neposredno pomiješan s uljima na bazi naftnih derivata, prirodnim rafinisanim uljima ili sintetičkim uljima;

b) amonij nitrat trenutno i neposredno pomiješan sa drugim materijalima radi proizvodnje eksplozivnih materija, a koji nije osjetljiv na detonatorsku kapslu;

c) eksplozivne materije koje nastaju trenutnim i neposrednim mješanjem materija na bazi amonij nitrata i drugih materija, a koje same po sebi nisu eksplozivne.

Član 41.

(Reciklaža i neutralizacija eksplozivnih materija)

Pravno lice koje ima odobrenje za proizvodnju eksplozivne materije može da vrši reciklažu i neutralizaciju eksplozivnih materija.

Član 42.

(Dokumenti koje je proizvođač dužan da ima za svaku eksplozivnu materiju)

(1) Pravno lice koje proizvodi eksplozivne materija dužno je da za svaku eksplozivnu materiju koju proizvodi ima dokument o ocjeni usaglašenosti sa tehničkim zahtjevima, tehničku specifikaciju i uputstvo o upotrebi, skladištenju i uništavanju eksplozivnih materija.

(2) Pravno lice koje proizvodi pirotehnička sredstva dužno je da, uz dokumentaciju iz stava (1) ovog člana, ima i oznaku razreda proizvodnje.

(3) Pravno lice koje proizvodi eksplozivne materije dužno je da vodi evidenciju o sirovinama koje ulaze u sastav proizvedene eksplozivne materije.

Član 43.

(Osiguranje objekata u kojima se proizvode eksplozivne materije)

(1) Objekti u kojima se proizvode eksplozivne materije moraju biti osigurani 24-satnim nadzorom putem fizičke i/ili tehničke zaštite, što se vrši u skladu sa propisom iz člana 20. ovog zakona, te osigurani potrebnim uređajima i instalacijama za sprečavanje i gašenje požara u skladu sa propisom koji reguliše zaštitu od požara i moraju imati gromobransku instalaciju, koji se moraju održavati u ispravnom stanju.

(2) Pravno lice koje proizvodi eksplozivnu materiju je dužno da eksplozivne materije smjesti u skladišne objekte.

Član 44.

(Unutrašnji promet eksplozivnih materija)

Pravno lice koje se bavi proizvodnjom eksplozivnih materija može za unutrašnji promet proizvoditi samo eksplozivne materije čiji promet je dozvoljen.

Član 45.

(Istraživanje eksplozivnih materija)

(1) Pravno lice koje je registrovano za obavljanje poslova naučnoistraživačke djelatnosti može se baviti poslovima istraživanja novih eksplozivnih materija kada dobije odobrenje za obavljanje poslova istraživanja novih eksplozivnih materija.

(2) Odobrenje iz stava (1) ovog člana izdaje Federalno ministarstvo na zahtjev pravnog lica koje se bavi poslovima naučnoistraživačke djelatnosti uz koji dostavlja sljedeće:

a) dokaz o upisu djelatnosti za obavljanje poslova naučnoistraživačke djelatnosti;

b) podatke o odgovornim licima u pravnom licu (ime i prezime, datum i mjesto rođenja, JMB, adresa prebivališta);

c) spisak lica koja rukuju eksplozivnim materijama u procesu proizvodnje sa podacima (ime i prezime, datum i mjesto rođenja, JMB, adresa prebivališta, naziv radnog mjesta);

ć) dokaz o pravu vlasništva ili prava korištenja poslovnog prostora u kojem će se obavljati istraživanje eksplozivnih materija;

č) dokaz o ispunjavanju uvjeta za skladištenje eksplozivnih materija;

d) podatke o vrstama eksplozivnih materija koje namjeravaju istraživati;

đ) elaborat - tehnološki postupak istraživanja eksplozivnih materija;

dž) opis sistema vlastite kontrole kvaliteta u toku procesa istraživanja.

(3) Odobrenje iz stava (1) ovog člana donosi se u vidu rješenja, na koje se ne može izjaviti žalba, ali se može pokrenuti upravni spor.

(4) Federalno ministarstvo donosi rješenje o ukidanju odobrenja za obavljanje poslova istraživanja novih eksplozivnih materija na zahtjev pravnog lica ili ako pravno lice prestane da ispunjava uvjete iz stava (1) ovog člana, na koje se ne može izjaviti žalba, ali se može pokrenuti upravni spor.

(5) Pravno lice je dužno u roku od osam dana od dana prijema rješenja o ukidanju odobrenja za istraživanje eksplozivnih materija sve evidencije koje je vodilo prema ovom zakonu dostaviti Federalnom ministarstvu.

Član 46.

(Godišnji izvještaj o proizvedenim i prodatim, odnosno utrošenim i uništenim količinama eksplozivne materije)

(1) Pravno lice koje ima odobrenje iz čl.: 29., 37. i 38. ovog zakona dužno je Federalnom ministarstvu podnijeti godišnji izvještaj o proizvedenim i prodatim, odnosno utrošenim i uništenim količinama eksplozivne materije najkasnije do 31. januara tekuće godine, za prethodnu godinu.

(2) Izvještaj iz stava (1) ovog člana obavezno sadrži: količinu proizvedenih eksplozivnih materija sa podacima o lokacijama proizvodnje, prodate, odnosno utrošene količine sa podacima o krajnjem korisniku, podatke o uništenim količinama, lokaciji na kojoj je izvršeno uništavanje i razloge uništavanja.

Član 47.

(Evidencija o proizvedenim eksplozivnim materijama)

Pravno lice koje se bavi proizvodnjom eksplozivne materije u skladu s ovim zakonom dužno je da o proizvedenim eksplozivnim materijama uredno vodi evidenciju, čiji će sadržaj i način vođenja biti utvrđen propisom iz člana 131. ovog zakona te druga pitanja koja se odnose na vođenje te evidencije.

4. Promet eksplozivnih materija

Član 48.

(Odobrenje za promet eksplozivnih materija)

(1) Pravno lice može obavljati poslove prometa eksplozivnih materija ako je registrovano za obavljanje te djelatnosti kod nadležnog suda i ima odobrenje za promet eksplozivnih materija, koje izdaje Federalno ministarstvo.

(2) Odobrenje iz stava (1) ovog člana izdaje se na zahtjev pravnog lica koje, uz zahtjev, prilaže sljedeće:

a) podatke o odgovornom licu;

b) spisak lica koja će rukovati eksplozivnim materijama u toku prometa eksplozivnim materijama (rukovalac prometa eksplozivnim materijama, lica koja neposredno obavljaju promet eksplozivnim materijama);

c) dokaz o posjedovanju skladišnog objekta za smještaj eksplozivnih materija.

(3) Odobrenje iz stava (1) ovog člana donosi se u vidu rješenja, na koje se ne može izjaviti žalba, ali se može pokrenuti upravni spor.

(4) Odobrenje iz stava (1) ovog člana može sadržavati dodatne mjere zaštite, života zdravlja i sigurnosti ljudi i njihove imovine i zaštitu životne sredine.

(5) Federalno ministarstvo donosi rješenje o ukidanju odobrenja za promet eksplozivnih materija na zahtjev pravnog lica ili ako pravno lice prestane da ispunjava uvjete iz stava (2) ovog člana, na koje se ne može izjaviti žalba, ali se može pokrenuti upravni spor kod nadležnog kantonalnog suda.

(6) Pravno lice dužno je u roku od osam dana od dana prijema rješenja o ukidanju odobrenja za promet eksplozivnih materija dostaviti Federalnom ministarstvu sve evidencije koje je vodilo prema ovom zakonu.

Član 49.

(Prodaja eksplozivnih materija pravnom licu koji ima odobrenje za nabavku eksplozivnih materija)

Pravno lice koje obavlja promet eksplozivnih materija može prodavati eksplozivne materije samo pravnom licu koje ima odobrenje za nabavku eksplozivnih materija u količini koja je navedena u tom odobrenju.

5. Nabavka eksplozivnih materija

Član 50.

(Odobrenje za nabavku eksplozivnih materija)

(1) Eksplozivne materije mogu se nabavljati samo na osnovu odobrenja za njihovu nabavku.

(2) Odobrenje iz stava (1) ovog člana izdaje kantonalno ministarstvo na čijem području je sjedište pravnog lica, kome se odobrenje izdaje.

(3) Zahtjev za izdavanje odobrenja za nabavku eksplozivnih materija potrebno je da sadrži sljedeće podatke o:

- a) podnosiocu zahtjeva (naziv i sjedište, odnosno ime i prezime, adresa i broj lične karte);
- b) nazivu, količini, načinu pakovanja, proizvođaču eksplozivne materije, razlozima i opravdanosti nabavke;
- c) mjestu i približno vrijeme upotrebe;
- d) licu koje će preuzeti eksplozivnu materiju;
- e) licu koje će rukovati eksplozivnim materijama;

f) načinu i uvjetima skladištenja eksplozivne materije.

(4) Podnosiocu zahtjeva za izdavanje odobrenja iz stava (1) ovog člana mogu se odrediti dodatne sigurnosne i druge mjere zaštite radi zaštite života, zdravlja, sigurnosti ljudi i životne sredine.

(5) Odobrenje za nabavku iz stava (1) ovog člana nije potrebno za nabavku municije za lovačke puške sa neolučenim cijevima kad je nabavljaju lica kojima je izdat oružni list za to oružje, kao i na kapisle za uobičajene dječije igračke.

(6) Odredba stava (1) ovog člana ne odnosi se na kapisle za uobičajene dječije igračke.

Član 51.

(Rokovi za izdavanje odobrenja za nabavku)

(1) Odobrenje za nabavku iz člana 50. ovog zakona izdaje se s određenim rokom važenja, uzimajući u obzir stvarne potrebe pravnog lica koje traži odobrenje za nabavku, čiji rok važenja može biti najviše do 60 dana.

(2) Ako nabavka eksplozivnih materija u roku iz stava (1) ovog člana iz opravdanih razloga ne bude ostvarena, kantonalno ministarstvo, na zahtjev pravnog lica na koje glasi odobrenje, produžiti će rok važenja odobrenja. Vrijeme važenja odobrenja može se produžiti samo jedanput i to najviše za vrijeme određeno u stavu (1) ovog člana.

Član 52.

(Sadržaj rješenja o nabavci eksplozivnih materija)

(1) Rješenjem kojim se odobrava nabavka eksplozivnih materija sadrži, pored ostalog, vrstu i količinu eksplozivne materije za koje se izdaje odobrenje, kao i rok važenja odobrenja.

(2) Rješenjem kojim se nabavka eksplozivne materije odobrava pravnom licu radi izvršenja određenih radova određuje se i svrha u koju se eksplozivne materije mogu upotrijebiti, kao i rok do kojeg se one imaju upotrijebiti, odnosno uništiti ili vratiti pravnom licu od kojeg su nabavljene.

(3) Kantonalno ministarstvo može rješenjem kojim se odobrava nabavka eksplozivne materije odrediti sigurnosne i druge mjere, koje je pravno lice dužno preduzeti prilikom prevoza, prenosa, smještaja i upotrebe tih materija.

(4) Pravno lice dužno je pridržavati se naloženih mjera iz st. (2) i (3) ovog člana.

Član 53.

(Podaci koje pravno lice upisuje na oba primjerka rješenja)

Pravno lice od kojeg su nabavljene eksplozivne materije dužno je da na oba primjerka rješenja iz člana 52. ovog zakona, pored vrste i količine prodane eksplozivne materije, naznači i datum izdavanja tih materija, kao i oznake pakovanja iz člana 18. ovog zakona.

Član 54.

(Prijavljivanje eksplozivne materije kantonalnom ministarstvu na čijem se prostoru nalaze, a za koje to kantonalno ministarstvo nije izdalo odobrenje za nabavku)

(1) Pravno lice koje skladišti ili na drugi način drži ili upotrebljava eksplozivne materije na području Federacije, a za koje nije izdato odobrenje za njihovu nabavku od kantonalnog ministarstva na čijem području se te eksplozivne materije skladište ili upotrebljavaju, dužno je da tom kantonalnom ministarstvu, prije upotrebe, a najkasnije u roku od 24 sata od njihove dopreme, prijavi vrstu i količinu tih eksplozivnih materija, navodeći dan, sat, način i svrhu dopreme, naziv organa koji je izdao odobrenje za njihovu nabavku, mjesto i način usklađivanja, odnosno držanja tih eksplozivnih materija, kao i vrijeme i mjesto njihove upotrebe.

(2) Kantonalno ministarstvo može zabraniti upotrebu eksplozivnih materija ako za to nisu ispunjeni propisani uvjeti.

(3) Zabranjuje se upotreba eksplozivne materije fizičkom licu, osim ako je ovim zakonom drugačije određeno.

Član 55.

(Obaveza odgovornog lica u objektu u kojem se vrši prodaja eksplozivne materije)

(1) Odgovorno lice u objektu u kojem se vrši prodaja eksplozivne materije može izdati eksplozivnu materiju samo licu na koje odobrenje glasi, kao i licu koje je u odobrenju za nabavku za to izričito ovlašteno. Prije izdavanja eksplozivne materije, odgovorno lice u objektu u kojem se vrši prodaja eksplozivne materije dužno je da utvrdi identitet lica koje traži da mu se ta materija izdaje.

(2) Odgovorno lice u objektu u kojem se obavlja prodaja eksplozivne materije neće izdati eksplozivnu materiju licu za koje se osnovano može zaključiti da je pod uticajem alkohola ili da su nastupile druge okolnosti koje ga čine nepodobnim za preuzimanje eksploziva.

6. Prevoz eksplozivnih materija

Član 56.

(Uvjeti za nošenje ili prevoz eksplozivnih materija)

(1) Lice koje nosi ili prevozi eksplozivne materije u toku nošenja ili prevoza eksplozivnih materija kod sebe mora imati odobrenje na osnovu kojeg su te materije nabavljene.

(2) Ovlaštena lica unutrašnjih poslova i poslova policije oduzet će na licu mjesta eksplozivne materije za koje njihov imalac nema propisano odobrenje.

Član 57.

(Odobrenje za prevoz opasnih materija)

(1) Odobrenje za prevoz eksplozivne materije preko granice Bosne i Hercegovine i teritorije Federacije (uvoz, izvoz i tranzit) izdaje Federalno ministarstvo.

(2) Odobrenje za prevoz eksplozivnih materija u unutrašnjem prevozu u Federaciji izdaje mjesno nadležno kantonalno ministarstvo - policijska uprava ili policijska stanica u mjestu iz kojeg se upućuje eksplozivna materija.

(3) Kantonalno ministarstvo - policijska uprava ili policijska stanica dužna je odmah po izdavanju odobrenja iz stava (2) ovog člana o izdatom odobrenju obavijestiti pisanim putem ostala kantonalna ministarstva na pravcu kretanja prevoza i Federalnom ministarstvu.

(4) Zahtjev za izdavanje odobrenja za prevoz eksplozivnih materija sadrži sljedeće podatke:

- a) naziv podnosioca zahtjeva i podatke o proizvođaču, pošiljaocu, prevozniku i primaocu i kontakt-telefone;
- b) UN brojeve eksplozivne materije i naziv u skladu sa međunarodnim ugovorima;
- c) podatke o vrsti, tehničkom nazivu, količini i načinu pakovanja i karakteristikama;
- ć) način prevoza (drumski, željeznički, zračni, vodeni);
- č) podatke o mjestu utovara i istovara;
- d) polazna tačka i planirani datum i približan sat polaska prevoza;
- dž) konačno odredište i planirano vrijeme dolaska na odredište;
- e) detaljan pravac kretanja od polazne tačke do konačnog odredišta;
- f) podatke o vozilu i vozaču za prevoz eksplozivne materije (broj ADR certifikata za vozača i vozilo i rok važenja) i kontakt-telefon;
- g) odobrenje nadležnog organa susjedne države kojim se odobrava uvoz ili tranzit;
- h) podatke da je eksplozivna materija stavljena u promet u skladu s odredbama ovog zakona;
- i) odobrenje za nabavku eksplozivnih materija.

(5) Odobrenje iz stava (1) i (2) ovog člana donosi se u vidu rješenja.

(6) Na odobrenje iz stava (1) ovog člana ne može izjaviti žalba, ali se može pokrenuti upravni spor kod nadležnog kantonalnog suda.

(7) Na odobrenje iz stava (2) ovog člana može se izjaviti žalba Federalnom ministarstvu u roku od osam dana od dana prijema rješenja.

(8) U prilogu zahtjeva iz stava (3) ovog člana potrebno je dostaviti odobrenje za uvoz/izvoz eksplozivnih materija izdato od Ministarstva spoljne trgovine i ekonomskih odnosa Bosne i Hercegovine.

(9) Pravno ili fizičko lice koje u okviru svoje djelatnosti izvodi minerske radove, u zahtjevu za izdavanje odobrenja za prevoz eksplozivnih materija u unutrašnjem saobraćaju, pored podataka iz stava (3) ovog člana, prilaže i ugovor o izvođenju minerskih radova.

Član 58.

(Utvrdjivanje mjera sigurnosti u toku prevoza eksplozivnih materija)

(1) Kod odlučivanja o određivanju posebnih mjera sigurnosti pri prevozu eksplozivnih materija mora se uzeti u obzir vrsta i količina eksplozivne materije koja se prevozi, vrsta prevoznog sredstva, okolnosti puta i saobraćaja na pravcima prevoza, kao i druge okolnosti od značaja za sigurnost pri prevozu.

(2) Ako nadležni organ koji izdaje odobrenje iz člana 57. ovog zakona smatra da su mjere sigurnosti koje je predvidio pošiljalac, prevoznik ili primalac potrebne, rješenjem će odrediti te mjere kao obavezne.

(3) Ako se prevoz eksplozivnih materija vrši preko područja dvije ili više općina na teritoriji Federacije, a nadležni organ naredi preduzimanje posebnih mjera sigurnosti, o tome se mora obavijestiti kantonalna ministarstva preko čijih područja će se vršiti prevoz pošiljke.

7. Upotreba eksplozivnih materija

7.1. Način upotrebe eksplozivnih materija

Član 59.

Upotreba eksplozivne materije na mjestu koje je određeno u odobrenju za nabavku)

(1) Pravno lice može eksplozivnu materiju upotrebljavati samo na mjestu koje je određeno u odobrenju za nabavku iz člana 50. ovog zakona, ukoliko je to mjesto navedeno u odobrenju.

(2) Pravno lice koje nabavi eksplozivnu materiju dužno je da je čuva, kako ne bi došla u dodir sa neovlaštenim licem i pridržavati se uputstva proizvođača o načinu njezine upotrebe, čuvanja i uvjetima smještaja.

Član 60.

(Uvjeti za upotrebu eksplozivne materije)

(1) Pravno lice se može baviti upotrebom eksplozivne materije u obavljanju svoje djelatnosti ako je registrovano za obavljanje te djelatnosti koja zahtijeva upotrebu eksplozivne materije i ako ispunjava propisane uvjete za smještaj eksplozivne materije te osigura lice koje je stručno osposobljeno za poslove neposredne upotrebe eksplozivne materije u skladu sa propisom iz člana 13. stav (3) ovog zakona.

(2) Pravno lice može povjeriti poslove neposredne upotrebe eksplozivnih materija u građevinarstvu, koju to pravno lice nabavi, samo licu koje je stručno osposobljeno i koje ima rješenje o obavljanju poslova miniranja izdato u skladu s odredbama iz člana 69. ovog zakona.

Član 61.

(Potvrda o predaji eksplozivnih materija mineru)

(1) Pravno lice dužno je voditi nadzor nad licem koje vrši paljenje eksploziva (u dalnjem tekstu: miner) u pogledu količine utrošenih eksplozivnih materija.

(2) Pravno lice kojem je odobrenje za nabavku eksplozivnih materija izdato radi izvršenja određenih radova obavezno je da preda eksplozivne materije mineru uz potvrdu koja sadrži: datum izdavanja, vrstu i količinu izdatih eksplozivnih materija, vrijeme predviđeno za paljenje (datum i sat), kao i potpis minera.

(3) Miner je dužan da istog dana, po izvršenom paljenju, pravnom licu od koga je primio eksplozivne materije izda potvrdu sa podacima o vremenu kad su eksplozivne materije upotrijebljene (datum i sat), vrsti i količini utrošenih eksplozivnih materija i u koju svrhu su eksplozivne materije upotrijebljene.

(4) Za tačnost podataka u potvrdama iz st. (2) i (3) ovog člana odgovorni su i vlasnik eksplozivnih materija i miner.

Član 62.

*(Vraćanje neupotrijebljenih eksplozivnih materija
i neupotrebljive ambalaže)*

(1) Pravno lice koje upotrebljava eksplozivne materije dužno je vratiti neupotrijebljenu eksplozivnu materiju i neupotrebljivu ambalažu u kojoj su bile upakovane eksplozivne materije pravnom licu od kojeg ih je nabavilo ili uništiti u skladu s uputstvom proizvođača na način kojim ne ugrožava život i zdravlje ljudi te njihovu imovinu i životnu sredinu. Prevoz eksplozivnih materija kojima vraća neupotrijebljene eksplozivne materije i neupotrebljivu ambalažu obavlja na osnovu odobrenja o prevozu na osnovu kojeg je dovezao tu materiju za upotrebu.

(2) Pravno lice iz stava (1) ovog člana dužno je obavijestiti kantonalno ministarstvo koje je izdalo odobrenje za nabavku eksplozivnih materija o mjestu, vremenu i načinu uništavanja neupotrijebljenih eksplozivnih materija i neupotrebljive ambalaže i to najkasnije dva dana od dana određenog za uništenje tih materija, odnosno ambalaže.

Član 63.

*(Odobrenje za upotrebu eksplozivnih materija u svrhu
ispitivanja kontrole kvaliteta)*

(1) Pravno lice koje ispituje proizvode za čiju kontrolu kvaliteta se koriste eksplozivne materije može upotrebljavati eksplozivne materije kada dobije odobrenje Federalnog ministarstva za upotrebu eksplozivnih materija radi ispitivanju kvaliteta proizvoda.

(2) Uz zahtjev za izdavanje odobrenja iz stava (1) ovog člana potrebno je priložiti sljedeće:

a) dokaz da je pravno lice registrovano za djelatnost za čije poslove je potrebno ispitivanje kvaliteta proizvoda upotrebom eksplozivnih materija;

b) podatke o licima koja će rukovati eksplozivnim materijama;

c) podatke o licima koje će koristiti eksplozivne materije u toku ispitivanja kontrole kvaliteta proizvoda koji u sebi ne sadrže eksplozivne materije;

ć) dokaz o posjedovanju ili pravu korištenja poslovnog prostora u kojem će se upotrebljavati eksplozivne materije za ispitivanje kontrole kvaliteta proizvoda;

č) upotrebnu dozvolu za građevinu u kojoj će se upotrebljavati eksplozivne materije za ispitivanje kontrole kvalitete proizvoda, za skladištenje i/ili ispitivanje eksplozivnih materija;

d) opis postupka upotrebe eksplozivnih materija u procesu ispitivanja;

đ) upotrebnu dozvolu za građevinu u kojoj će se skladištiti eksplozivne materije ili upotrebnu dozvolu za građevinu u kojoj će se nalaziti priručno skladište ili dokaz o posjedovanju ormara koji je izrađen od materijala reakcije na požar A1 i najmanjeg razreda otpornosti na požar EI30, koji se zaključava i koji je pričvršćen na pod ili zid prostorije koja se zaključava.

(3) Maksimalna količina eksplozivnih materija koja se može čuvati u ormaru iz stava (2) tačka đ) ovog člana ne smije biti veća od 5 kg zajedno s barutom u sporogorećem štapinu i sredstvima za iniciranje.

(4) Federalno ministarstvo može izdati odobrenje za upotrebu više vrsta eksplozivnih materija u toku ispitivanja kontrole kvaliteta proizvoda koji u sebi ne sadrže eksplozivne materije.

(5) Federalno ministarstvo će rješenjem odbiti zahtjev za izdavanje odobrenja za upotrebu eksplozivnih materija u toku procesa ispitivanja kontrole kvaliteta proizvoda koji u sebi ne sadrže eksplozivne materije ako nisu ispunjeni uvjeti iz stava (2) ovog člana.

(6) Federalno ministarstvo će rješenjem ukinuti odobrenje za upotrebu eksplozivnih materija u toku ispitivanja kontrole kvaliteta proizvoda koji u sebi ne sadrže eksplozivne materije pravnom licu ako prestane ispunjavati propisane uvjete na osnovu kojih je navedeno odobrenje izdato ili na zahtjev pravnog lica na koje glasi odobrenje.

(7) Pravno lice dužno je, u roku od osam dana od dana dostave rješenja o ukidanju odobrenja za upotrebu eksplozivnih materija u toku ispitivanja kontrole kvaliteta proizvoda koji u sebi ne sadrže eksplozivne materije, kantonalnom ministarstvu dostaviti evidencije koje je bilo obvezno voditi prema ovom zakonu.

(8) Protiv rješenja iz st.: (1), (5) i (6) ovog člana ne može se izjaviti žalba, ali se može pokrenuti upravni spor kod nadležnog suda.

Član 64.

(Odobrenje za upotrebu eksplozivnih materija za spašavanje ljudi i imovine ili za potrebe obuke)

(1) Za spašavanje ljudi i imovine ili za potrebe obuke mogu se nabavljati i upotrebljavati eksplozivne materije na osnovu odobrenja kantonalnog ministarstva.

(2) Uz zahtjev za izdavanje odobrenja iz stava (1) ovoga člana potrebno je priložiti sljedeće:

a) dokaz da je registrovana djelatnost za obavljanje poslova spašavanja ljudi i imovine i provođenje obuke;

b) dokaz da u radnom odnosu ima zaposleno najmanje jedno lice koje je stručno osposobljeno za upotrebu eksplozivnih materija za potrebe spašavanja ljudi i imovine ili za potrebe obuke;

c) građevinsku dozvolu za građevinu u kojoj će se skladištiti eksplozivne materije ili građevinsku dozvolu za građevinu u kojoj će se nalaziti priručno skladište ili dokaz o posjedovanju ormara koji je izrađen od materijala reakcije na požar A1 i najmanjeg razreda otpornosti na požar EI30, koji se zaključava i koji je pričvršćen na pod ili zid prostorije koja se zaključava.

(3) Maksimalna količina eksplozivnih materija koja se može čuvati u ormaru iz stava (2) tačka c) ovog člana ne smije biti veća od 5 kg zajedno s barutom u sporogorećem štapinu i sredstvima za iniciranje.

(4) U slučaju promjene uvjeta na osnovu kojih je izdato odobrenje iz stava (1) ovog člana, pravno lice je dužno o nastaloj promjeni izvijestiti kantonalno ministarstvo koje je izdalo odobrenje u roku od osam dana od dana nastanka promjene.

(5) Kantonalno ministarstvo će rješenjem odbiti zahtjev za izdavanje odobrenja iz stava (1) ovog člana ako nisu ispunjeni uvjeti iz stava (2) ovog člana.

(6) Kantonalno ministarstvo će rješenjem ukinuti odobrenje iz stava (1) ovog člana ako pravno lice prestane ispunjavati uvjete na osnovu kojih je navedeno odobrenje izdato ili na zahtjev pravnog lica na koje odobrenje odnosi.

(7) Pravno lice dužno je u roku od osam dana od dana dostave rješenja o ukidanju odobrenja za upotrebu eksplozivnih materija kantonalnom ministarstvu dostaviti evidencije koje je bilo obavezno voditi u skladu s odredbama ovog zakona.

(8) Protiv rješenja iz st.: (1), (5) i (6) ovog člana može se se izjaviti žalba Federalnom ministarstvu u roku od osam dana od dana prijema rješenja.

Član 65.

(Vođenje evidencije o nabavljenim, utrošenim, ustupljenim, uništenim ili nestalim eksplozivnim materijama)

Pravna lica koja upotrebljavaju eksplozivne materije u obavljanju svoje djelatnosti dužna su uredno voditi evidenciju o nabavljenim, utrošenim, ustupljenim, uništenim ili nestalim eksplozivnim materijama, čiji će se način, sadržaj i način vođenja utvrditi u propisu iz člana 131. ovog zakona.

7.2. Poslovi miniranja

Član 66.

(Vrste poslova miniranja)

U poslove miniranja spadaju sljedeća miniranja i to:

a) nadzemna miniranja koja se odnose na:

- 1) miniranja na površini,
- 2) miniranja u građevinarstvu,
- 3) miniranja radi krčenja šuma (vađenje panjeva) i iskopu jama za sadnice,
- 4) miniranja za usitnjavanje prevelikih komada stijena;

b) specijalna miniranja koja se odnose na:

- 1) podvodna miniranja,
- 2) miniranja raznih građevina,
- 3) miniranja ledenih površina na rijekama i jezerima,
- 4) miniranja kod seizmičkih istraživanja,
- 5) tehnološka miniranja,

6) miniranja u toku izrade tunela i drugih podzemnih prostorija, osim podzemnih miniranja u toku eksploataciji mineralnih sirovina;

c) podzemna miniranja koja obuhvaćaju sve radnje podzemnog miniranja u toku eksploataciji mineralnih sirovina;

d) miniranja u toku razminiranja koja obuhvaćaju sva miniranja što se provode pri obavljanju tih poslova.

Član 67.

(Uvjeti za obavljanje poslova miniranja)

(1) Poslove miniranja mogu obavljati pravna lica kada dobiju odobrenje kantonalnog ministarstva za obavljanje jedne ili više vrsta miniranja.

(2) Uz zahtjev za izdavanje odobrenja iz stava (1) ovog člana potrebno je priložiti sljedeće:

- a) dokaz da imaju registrovanu djelatnost za obavljanje poslova miniranja;

b) dokaz da pravno lice ima u radnom odnosu najmanje jedno lice, koje posjeduje rješenje za miniranje iz člana 69. ovog zakona navedeno u zahtjevu, a koje je ujedno i odgovorno lice za poslove miniranja;

c) dokaz o pravu vlasništva ili pravu korištenja građevine u kojoj će se skladištiti eksplozivne materije, koja mora imati upotrebnu dozvolu za skladištenje eksplozivnih materija.

(3) Odobrenjem iz stava (1) ovoga člana odobrit će se za obavljanje one vrste miniranja za koju zaposleno lice posjeduje rješenje da je osposobljeno za poslove miniranja.

(4) U slučaju promjene uvjeta na osnovu kojih je izdato odobrenje iz stava (1) ovog člana, pravno lice na koje glasi odobrenje dužno je o nastaloj promjeni obavijestiti kantonalno ministarstvo u roku od osam dana od dana nastanka promjene u skladu s odredbama člana 22. ovog zakona.

(5) Kantonalno ministarstvo će rješenjem odbiti zahtjev za izdavanje odobrenja za miniranje ako nisu ispunjeni uvjeti iz stava (2) ovog člana.

(6) Kantonalno ministarstvo će rješenjem ukinuti odobrenje za obavljanje poslova miniranja pravnom licu ako prestane ispunjavati uvjete na osnovu kojih je navedeno odobrenje izdato ili na zahtjev pravnog lica na kojeg glasi odobrenje.

(7) Pravno lice dužno je u roku od osam dana od dana dostave rješenja o ukidanju odobrenja za obavljanje poslova miniranja kantonalnom ministarstvu dostaviti evidencije koje je bilo obavezno voditi prema ovom zakonu.

(8) Protiv rješenja iz st.: (1), (5) i (6) ovog člana može se izjaviti žalba Federalnom ministarstvu u roku od osam dana od dana prijema rješenja.

Član 68.

(Plan i izvještaj o miniranju)

(1) Prilikom obavljanja poslova miniranja, pravno lice iz člana 67. ovog zakona dužno je poduzeti sve sigurnosne mjere, uz obavljanje potrebnih mjerenja radi utvrđivanja potencijalno štetnih uticaja miniranja na životnu sredinu, to miniranje obaviti prema planu miniranja i po pravilima struke, uz primjenu važeće regulative, tako da se miniranjem ne ugrozi život i zdravlje ljudi, njihova imovina i životna sredina, a nakon miniranja izraditi izvještaj o miniranju.

(2) Plan miniranja i izvještaj o miniranju iz stava (1) ovog člana izrađuju lica koje posjeduju odgovarajuće rješenje za miniranje.

(3) O miniranjima koja se obavljaju u naseljenom mjestu ili u neposrednoj blizini naseljenog mjesta pravna lica koji izvode miniranje dužna su, najkasnije 24 sata prije obavljanja miniranja, obavijestiti kantonalno ministarstvo prema mjestu obavljanja miniranja, javnost putem lokalnih sredstava javnog saopćavanja, a tri dana prije obavljanja miniranja u blizini cesta, željeznica, naftovoda, plinovoda, vodovoda, električnih ili telefonskih vodova i sličnih objekata, pisano obavijestiti pravna lica koja upravljaju navedenim građevinama.

(4) Federalni ministar će propisati sadržaj plana miniranja i izvještaj o miniranju iz stava (1) ovog člana, kao i obrazac potvrde iz člana 61. ovog zakona, te sadržaj minerske knjižice koju miner mora imati u toku obavljanja poslova miniranja.

Član 69.

(Rješenje o obavljanju poslova miniranja)

(1) Poslove nadzemnih miniranja ili specijalnih miniranja ili podzemnih miniranja ili protivminiskog djelovanja, za potrebe pravnih lica iz člana 67. ovog zakona, može obavljati fizičko lice koji od kantonalnog ministarstva dobije rješenje za obavljanje poslova miniranja.

(2) Uz zahtjev za izdavanje rješenja iz stava (1) ovog člana fizičko lice je dužno priložiti sljedeće dokaze:

- a) da je državljanin Bosne i Hercegovine;
- b) da je starije od 21 godine života;
- c) da nije osuđeno za krivično djelo, osim krivičnih djela protiv sigurnosti saobraćaja;
- ć) da se protiv njega ne vodi krivični postupak;
- č) da u posljednje tri godine nije kažnjeno za prekršaj protiv javnog reda i mira s obilježljima nasilja;
- d) da ima najmanje svjedodžbu srednje stručne spreme rudarske struke;
- đ) dokaz o zdravstvenoj sposobnosti za rukovanje eksplozivnim materijama pri miniranju;
- dž) dokaz o položenom stručnom ispitu koji organizuje pravno lice koje ovlasti Federalno ministarstvo.

(3) Za obavljanje poslova miniranja za protivminsko djelovanje, pored dokaza iz stava (2) ovog člana, uz zahtjev, fizičko lice je dužno dostaviti i sljedeće:

- a) dokaz o posjedovanju ovlaštenja pirotehničara, izdatu prema propisima kojima se uređuju poslovi razminiranja i
- b) dokaz o radnom stažu u trajanju od najmanje jedne godine na poslovima razminiranja ili miniranja.

(4) Za obavljanje poslova specijalnih miniranja i podzemnih miniranja, pored dokaza iz stava (2) ovog člana, uz zahtjev, fizičko lice je dužno dostaviti i diplomu preddiplomskog ili diplomskog, odnosno univerzitetskog stručnog studija iz područja rudarske struke.

(5) U slučaju promjene uvjeta na osnovu kojih je doneseno rješenje iz stava (1) ovog člana, fizičko lice na koje glasi rješenje o odobrenju dužno je o nastaloj promjeni obavijestiti kantonalno ministarstvo u roku od osam dana od dana nastanka promjene.

(6) Kantonalno ministarstvo će rješenjem ukinuti rješenja o odobrenju za miniranje iz stava (1) ovog člana ako fizičko lice na koje glasi navedeno rješenje

prestane ispunjavati uvjete na osnovu kojih je izdato rješenje iz stava (1) ovog člana ili na zahtjev fizičkog lica na koje glasi navedeno rješenje.

(7) Protiv rješenja iz st. (1) i (6) ovoga člana može se izjaviti žalba Federalnom ministarstvu u roku od osam dana od dana prijema rješenja.

(8) Federalni ministar će propisati plan i program te način i postupak polaganja ispita iz stava (2) tačka dž) ovog zakona, kao i druga pitanja koja se odnose na plaganje tog ispita.

Član 70.

(Obavljanje pripremних i pomoćnih poslova kod miniranja)

(1) Poslove pripreme miniranja i pomoćne poslove pri miniranju za potrebe pravnog lica može obavljati fizičko lice s najmanje završenom osnovnom školom, koje je prethodno upoznato s opasnostima u toku rukovanju eksplozivnim materijama.

(2) Lice koje obavlja poslove iz stava (1) ovog člana mora biti pod nadzorom lica koja posjeduju rješenje za tu vrstu miniranja, u skladu s odredbama ovoga zakona.

Član 71.

(Izvođenje poslova miniranja samo na radilištu)

Miniranje se smije izvoditi samo na radilištima za koje je nadležni organ uprave izdao odgovarajuće odobrenje zavisno o vrsti radilišta.

Član 72.

(Obavještenje o upotrebi eksplozivnih materija)

(1) Pravno lice koje upotrebljava eksplozivne materije dužno je o mjestu i vremenu upotrebe eksplozivnih materija obavijestiti kantonalno ministarstvo prema mjestu upotrebe eksplozivnih materija najkasnije 24 sata prije početka upotrebe. Ako se upotreba eksplozivnih materija obavlja kontinuirano na istom mjestu, dovoljna je obavijest o prvom miniranju s naznakom predviđenog roka završetka radova.

(2) Pravno lice koje upotrebljava eksplozivne materije dužno je neupotrijebljene eksplozivne materije vratiti u originalnoj ambalaži u skladište ili ih uništiti prema uputstvu proizvođača tako da ne ugrožava život, zdravlje i sigurnost ljudi te materijalna dobra i životnu sredinu i uredno voditi evidenciju o uništenim količinama eksplozivnih materija.

7.3. Promet i upotreba pirotehničkih sredstava

Član 73.

(Kategorizacija pirotehničkih sredstava)

(1) Pravno lice koje proizvodi pirotehnička sredstva dužno je da izvrši kategorizaciju pirotehničkih sredstava prema vrsti upotrebe, namjeni i riziku na:

a) razred I – pirotehnička sredstva koja predstavljaju vrlo nizak rizik i zanemarljiv nivo buke i koja su namijenjena za upotrebu u ograničenim prostorima, uključujući i pirotehnička sredstva za vatromet namijenjena za upotrebu u zatvorenim prostorima (stambene zgrade i sl.);

b) razred II – pirotehnička sredstva koja predstavljaju nizak rizik i nizak nivo buke i koja su namijenjena za vanjsku upotrebu u ograničenim prostorima;

c) razred III – pirotehnička sredstva za vatromet koja predstavljaju srednji rizik, koja su namijenjena za vanjsku upotrebu na velikim otvorenim prostorima i čiji nivo buke nije štetan za ljudsko zdravlje;

d) razred IV – pirotehnička sredstva za vatromet koja predstavljaju visok rizik, koja smiju koristiti lica sa stručnim znanjem i čija razina buke nije štetna za ljudsko zdravlje (uobičajeno poznata kao sredstva za profesionalnu upotrebu);

e) razred T1 – pirotehnička sredstva za upotrebu na pozornicama (pirotehnička sredstva za primjenu u pozorištima i sl.) koja predstavljaju nizak rizik;

f) razred T2 – pirotehnička sredstva za upotrebu na pozornicama (pirotehnička sredstva za primjenu u pozorištima i sl.) koja smiju koristiti lica sa stručnim znanjem;

g) razred P1 – ostala pirotehnička sredstva koja predstavljaju nizak rizik, u koja spadaju i pirotehnička sredstva koja se koriste u poljoprivredi, avionskom prometu i sl., a služe za rastjerivanje ptica;

h) razred P2 – ostala pirotehnička sredstva koja predstavljaju visok rizik i kojima mogu rukovati lica sa stručnim znanjem.

(2) Federalni ministar propisat će sigurnosne zahtjeve i uvjete koje treba da ispunjavaju pirotehnička sredstva.

Član 74.

(Prodaja pirotehničkih sredstava razreda I)

(1) Pirotehnička sredstva razreda I mogu se prodavati u objektu u kojem se obavlja prodaja tokom cijele godine.

(2) U objektu u kojem se vrši prodaja - kiosku dozvoljeno je držati do 20 kg neto težine pirotehničkih sredstava razreda I, a u prodavnici do 60 kg neto težine pirotehničkih sredstava razreda I.

(3) Količina pirotehničkih sredstava razreda I veća od dozvoljene drži se u skladu s propisima o skladištenju eksplozivnih materija.

(4) U izlogu objekta u kojem se vrši prodaja dozvoljeno je držanje prazne ambalaže jednog pakovanja pirotehničkih sredstava.

Član 75.

(Prodaja pirotehničkih sredstava razreda II, III, T1 i P1)

(1) Pirotehnička sredstva razreda II, III, T1 i P1 mogu se prodavati u maloprodaji u objektu u kojem se obavlja prodaja oružja i municije ili u specijalizovanim objektima u kojima se obavlja prodaja pirotehničkih sredstava, od

15. decembra do 15. januara, kao i u posebnim vremenskim razdobljima uz odobrenje, a obavezno se drže u prodajnom prostoru i priručnom skladištu.

(2) U objektima iz stava (1) ovog člana, uključujući prateće prostore i priručno skladište uz objekat u kojem se obavlja prodaja, dozvoljeno je držati pirotehnička sredstva razreda I, II, III, T1 i P1 u količini do 60 kg neto pirotehničke smjese.

(3) Zahtjev za prodaju pirotehničkih sredstava iz stava (1) ovog člana u posebnom vremenskom razdoblju podnosi se kantonalnom ministarstvu - policijskoj upravi ili policijskoj stanici prema sjedištu objekta u kojem se obavlja prodaja.

(4) Zahtjev iz stava (3) ovog člana sadrži: naziv i sjedište podnosioca zahtjeva i obrazloženje za prodaju pirotehničkih sredstava u traženom vremenskom razdoblju.

(5) Odobrenje za prodaju pirotehničkih sredstava u posebnom vremenskom razdoblju izdaje rukovodilac policijske uprave ili policijske stanice iz stava (3) ovog člana.

(6) Protiv rješenja iz stava (5) ovog člana može se izjaviti žalba Federalnom ministarstvu u roku od osam dana od dana prijema rješenja.

Član 76.

(Zabrana prodaje pirotehničkih sredstava)

(1) Zabranjena je prodaja pirotehničkih sredstava razreda I licima mlađim od 14 godina.

(2) Zabranjena je prodaja pirotehničkih sredstava razreda II licima mlađim od 16 godina, a pirotehnička sredstva razreda III, T1 i P1 licima mlađim od 18 godina.

(3) Zabranjena je maloprodaja pirotehničkih sredstava razreda IV, T2 i P2.

Član 77.

(Zabrana prodaje pirotehničkih sredstava razreda II i III u zatvorenim prostorijama te prepravljanje pirotehničkih sredstava)

(1) Zabranjena je upotreba pirotehničkih sredstava razreda II i III u zatvorenim prostorijama, na prostorima gdje se okuplja veći broj lica i u periodu od 3. januara do 25. decembra, osim u posebnim slučajevima uz odobrenje iz člana 75. stav (5) ovog zakona.

(2) Zabranjeno je prepravljanje pirotehničkih sredstava radi povećanja učinka i njihova upotreba u drugim predmetima, kao i vlastita izrada pirotehničkih proizvoda i smjesa.

Član 78.

(Izuzetak od zabrana prodaje pirotehničkih sredstava)

Izuzetno, prodaja pirotehničkih sredstava koja se koriste u pozorištima, raketnom modelarstvu, poljoprivrednoj djelatnosti i sl. dozvoljena je tokom cijele godine.

Član 79.

(Upotreba pirotehničkih sredstava pod nadzorom roditelja ili staratelja)

Pirotehnička sredstva razreda III pod nadzorom roditelja ili staratelja mogu upotrebljavati i lica mlađa od 18 godina u skladu s uputstvom proizvođača.

Član 80.

(Udaljenost mjesta sa kojeg se vrši ispaljivanje protivgradnih raketa)

Mjesto na kome se vrši ispaljivanje protivgradnih raketa mora biti udaljeno najmanje 100 metara od stambenih i privrednih te drugih objekata.

Član 81.

(Ovlaštenje za donošenje propisa o uvjetima koje trebaju ispunjavati prodajni objekti za prodaju i držanje pirotehničkih sredstava)

Federalni ministar donijet će propis o uvjetima koje trebaju ispunjavati objekti u kojima se obavlja prodaja i držanje pirotehničkih sredstava.

7.4. Javni vatromet

Član 82.

(Odobrenje za obavljanje javnog vatrometa)

(1) Javni vatromet može obavljati pravno lice na osnovu odobrenja za obavljanje javnog vatrometa.

(2) Zahtjev za izdavanje odobrenja iz stava (1) ovog člana podnosi se Federalnom ministarstvu.

(3) Uz zahtjev iz stava (2) ovog člana prilaže se sljedeće:

- a) dokaz o upisu djelatnosti u sudski registar;
- b) dokaz o posjedovanju poslovnih prostorija za obavljanje registrovane djelatnosti;
- c) podaci o odgovornom licu koje ispunjava uvjete iz člana 14. stav (1) tačka b) ovog zakona i podaci o stručno osposobljenom licu za izvođenje javnog vatrometa koje ispunjava uvjete iz člana 13. stav (1) ovog zakona;
- d) dokaz o stručnoj osposobljenosti za izvođenje javnog vatrometa za najmanje jednog zaposlenika;
- e) dokaz o uvjetima za skladištenje i mjerama fizičko-tehničke zaštite skladišta vatrometnih sredstava.

(4) Odobrenje iz stava (1) ovog člana izdaje federalni ministar u vidu rješenja.

(5) Na rješenje iz stava (1) ovog člana ne može se izjaviti žalba, ali se može

pokrenuti upravni spor kod nadležnog kantonalnog suda.

Član 83.

(Uvjeti za ukidanje odobrenja za obavljanje javnog vatrometa)

(1) Odobrenje za obavljanje javnog vatrometa ukinut će se rješenjem u slučajevima da pravno lice:

a) ne ispunjava uvjete za obavljanje javnog vatrometa propisane ovim zakonom;

b) ne izvodi javni vatromet u skladu s ovim zakonom.

(2) Pravno lice dužno je Federalnom ministarstvu dostaviti sve evidencije, koje vodi prema ovom zakonu u roku od osam dana od konačnosti rješenja o ukidanju odobrenja za obavljanje javnog vatrometa.

(3) Na rješenje iz stava (1) ovog člana ne može se izjaviti žalba, ali se može pokrenuti upravni spor kod nadležnog suda.

Član 84.

(Uvjeti za izvođenje javnog vatrometa)

(1) Izvođenje javnog vatrometa može se obavljati na osnovu odobrenja za mjesto i vrijeme izvođenja javnog vatrometa.

(2) Zahtjev za izdavanje odobrenja iz stava (1) ovog člana podnosi se kantonalnom ministarstvu - policijskoj upravi ili policijskoj stanici prema mjestu izvođenja javnog vatrometa.

(3) Uz zahtjev iz stava (2) ovog člana prilaže se ovjerena kopija odobrenja za obavljanje javnog vatrometa, a zahtjev treba da sadrži: naziv i sjedište podnosioca zahtjeva, podatke o mjestu, vremenu i obrazloženje o opravdanosti izvođenja javnog vatrometa.

(4) Odobrenje iz stava (1) ovog člana izdaje policijska uprava ili policijska stanica kantonalnog ministarstva u vidu rješenja, na koje se može izjaviti žalba Federalnom ministarstvu u roku od osam dana do dana prijeme rješenja.

Član 85.

(Zabrana izvođenja javnog vatrometa)

Zabranjeno je izvođenje javnog vatrometa licu koje nije stručno osposobljeno za njegovo izvođenje.

Član 86.

(Ovlaštenje za donošenje propisa za obavljanje javnog vatrometa)

Federalni ministar propisat će način obavljanja javnog vatrometa, program stručnog osposobljavanja te postupak provođenja stručnog ispita za lice koje izvodi javni vatromet, oblik i sadržaj odobrenja za izvođenje javnog vatrometa, tehničkim i sigurnosnim zahtjevima vezano za mjesta ispaljivanja, sredstva za ispaljivanje i druge zahtjeve potrebne za izvođenje javnog vatrometa kao i druga pitanja koja se odnose na javni vatromet.

7.5. Izvođenje glasnog pucnja

Član 87.

(Odobrenje za izvođenje glasnog pucnja)

(1) Izvođenje glasnog pucnja obavlja se na osnovu odobrenja za njegovo izvođenje.

(2) Odobrenje iz stava (1) ovog člana nije potrebno ukoliko se pucanj izvodi startnom municijom ili pirotehničkim sredstvima razreda I.

(3) Zahtjev iz stava (1) ovog člana podnosi se Federalnom ministarstvu prema mjestu izvođenja glasnog pucnja.

(4) Uz zahtjev iz stava (3) ovog člana prilaže se sljedeće:

- a) dokaz o upisu djelatnosti u sudski registar;
- b) dokaz o posjedovanju poslovnih prostorija za obavljanje registrovane djelatnosti;
- c) podaci o odgovornom licu koje ispunjava uvjete iz člana 14. ovog zakona i podaci o licu stručno osposobljenom za izvođenje glasnog pucnja koje ispunjava uvjete iz člana 13. ovog zakona;
- d) dokaz o stručnoj osposobljenosti za izvođenje glasnog pucnja, za najmanje jednog zaposlenika;
- e) dokaz o uvjetima za skladištenje eksplozivnih sredstava potrebnih za obavljanje glasnog pucnja ili dokaz o posjedovanju metalnog ormara koji se zaključava, minimalne vatrootpornosti od 60 minuta i koji je pričvršćen na pod ili zid prostorije koja se zaključava, te dokaz o provedenim mjerama fizičko-tehničke zaštite koje se vrše u skladu sa propisom iz člana 20. ovog zakona;
- f) dokaz ili izjavu o posjedovanju odgovarajućih naprava kojima će se izvoditi glasni pucanj;
- g) opći akt iz člana 91. ovog zakona.

(4) Odobrenje iz stava (1) ovog člana izdaje se u vidu rješenja na koje se ne može izjaviti žalba, ali se može pokrenuti upravni spor kod naležnog kantonalnog suda.

Član 88.

(Uvjeti za oduzimanje odobrenja za izvođenje glasnog pucnja)

(1) Odobrenje za izvođenje glasnog pucnja će se ukinuti rješenjem u slučajevima da pravno lice:

- a) ne ispunjava uvjete za izvođenje glasnog pucnja propisane ovim zakonom;
- b) ne izvodi glasni pucanj u skladu s ovim zakonom.

(2) Federalno ministarstvo je dužno u roku od tri dana donijeti rješenje o ukidanju rješenja za izvođenje glasnog pucnja kada sazna da pravno lice ispunjava uvjete iz stava (1) ovog člana.

(3) Pravno lice je dužno kantonalnom ministarstvu dostaviti sve evidencije koje vode prema ovom zakonu u roku od osam dana od konačnosti rješenja o oduzimanju odobrenja za obavljanje glasnog pucnja.

(4) Na rješenje iz stava (2) ovog člana ne može se izjaviti žalba, ali se može pokrenuti upravni spor kod nadležnog kantonalnog suda.

Član 89.

(Zabrana za izvođenje glasnog pucnja)

Zabranjeno je izvođenje glasnog pucnja licu koje nije stručno osposobljeno za rukovanje eksplozivnim materijama.

Član 90.

(Odobrenje za mjesto i vrijeme izvođenja glasnog pucnja)

(1) Izvođenje glasnog pucnja obavlja se na osnovu odobrenja za mjesto i vrijeme njegovog izvođenja.

(2) Zahtjev za izdavanje odobrenja iz stava (1) ovog člana podnosi se kantonalnom ministarstvu - policijskoj upravi ili policijskoj stanici prema mjestu izvođenja glasnog pucnja.

(3) Uz zahtjev iz stava (2) ovog člana prilaže se ovjerena kopija odobrenja za izvođenje glasnog pucnja, a zahtjev treba da sadrži: tačno vrijeme i mjesto izvođenja glasnog pucnja; podatke o licima koja će izvoditi glasni pucanj i vrsti i količini eksplozivnih materija koje će biti upotrijebljene za izvođenje glasnog pucnja, popis mjera i radnji koje će se pri izvođenju glasnog pucnja poduzeti radi zaštite života, zdravlja i sigurnosti ljudi, materijalnih dobara i životne sredine.

(4) Odobrenje iz stava (1) ovog člana izdaje policijska uprava ili policijska stanica kantonalnog ministarstva u vidu rješenja na koje se može izjaviti žalba Federalnom ministarstvu u roku od osam dana do dana prijema rješenja.

Član 91.

(Dužnost donošenja općeg akta)

Pravno lice koje izvodi javni vatromet ili glasni pucanj dužno je donijeti opći akt koji sadrži način i uvjete pod kojima se čuvaju naprave za izvođenje glasnog pucnja, skladištenje i čuvanje eksplozivnih materija, način vođenja evidencija o eksplozivnim materijama i napravama, stručno osposobljavanje lica koja će izvoditi glasni pucanj.

8. Uništavanje eksplozivnih materija

Član 92.

(Uvjeti za uništavanje eksplozivnih materija)

(1) Eksplozivne materije se uništavaju u skladu s uputstvom proizvođača na mjestima gdje je dozvoljena upotreba eksplozivnih materija, s tim da se postupak uništavanja eksplozivne materije provodi na način koji ne ugrožava život, zdravlje, imovinu i sigurnost ljudi te životnu sredinu.

(2) Eksplozivne materije mogu uništavati samo lica koja su stručno osposobljena za rukovanje eksplozivnih materija iz člana 13. ovog zakona.

(3) Uništavanje eksplozivni materija obavlja se na lokaciji koju odredi kantonalno ministarstvo.

Član 93.

(Postupanje prilikom uništavanja eksplozivnih materija)

(1) Pravno lice prilikom uništavanja eksplozivnih materija dužno je da postupa u skladu s odredbom člana 72. stav (2) ovog zakona.

(2) Ako se prilikom uništenja eksplozivnih materija predviđa jaka detonacija, pravno lice dužno je postupiti u skladu s odredbom člana 68. stav (3) ovog zakona.

9. Skladištenje eksplozivnih materija

Član 94.

(Držanje većih količina eksplozivnih materija)

Pravna lica količine eksplozivnih materija preko 20 kg drže u propisno izgrađenim skladištima, odnosno kontejnerima ili priručnim skladištima, u skladu s odredbama ovoga zakona.

Član 95.

(Skladišta za držanje eksplozivnih materija)

(1) Skladišta u kojima se drže eksplozivne materije moraju se održavati u skladu sa propisanim tehničkim normativima.

(2) Držanje eksplozivnih materija u skladištu za smještaj eksplozivne materije, u pogledu vrste i količine, moraju biti u skladu sa rješenjem kojim je odobrena upotreba tog skladišta.

Član 96.

(Lokacije skladišta)

Skladišta za smještaj eksplozivne materije su izvan naseljenih mjesta i dovoljno udaljeni od javnih cesta, željezničkih pruga i dalekovoda visokog napona, odnosno odvojeni od tih objekata zaštitnim grudobranom ili zidom koji pruža punu zaštitu od eksplozije i požara.

Član 97.

(Osiguranje skladišta)

(1) Skladišta u kojima su smještene eksplozivne materije osiguravaju se od pristupa neovlaštenih lica u skladu sa projektovanim sigurnosnim mjerama.

(2) Ključeve od magacina u kojima se drže eksplozivne materije može čuvati samo lice koje se brine o smještaju i izdavanju tih materija.

Član 98.

(Urbanistička saglasnost za izgradnju skladišta eksplozivnih materija)

(1) Urbanistička saglasnost za izgradnju skladišta eksplozivnih materija neće se izdati ako se ne pribavi saglasnost za lokaciju od kantonalnog ministarstva.

(2) Prije izdavanja saglasnosti, kantonalno ministarstvo može od investitora zatražiti da na tehničku dokumentaciju iz stava (3) ovog člana pribavi stručnu ocjenu o primjeni mjera i normativa zaštite od požara i eksplozija od stručnog i ovlaštenog poduzeća ili drugog pravnog lica registrovanog u Federaciji u skladu sa Zakonom o zaštiti od požara i vatrogastvu.

(3) Podnosilac zahtjeva za izdavanje saglasnosti za lokaciju objekta uz zahtjev prilaže:

a) situacijski plan terena na kome namjerava graditi objekt za koji se traži saglasnost mjesta s ucrtanim položajem i gabaritima već postojećih objekata, ovjeren od općinskog organa uprave nadležnog za poslove katastra;

b) tehnički opis terena prikazanog na situacijskom planu;

c) tehnički opis objekta koji se namjerava graditi;

ć) popis vrste i količine eksplozivnih materija koje će se uskladištiti.

Član 99.

(Odobrenje za izgradnju skladišta za smještaj eksplozivnih materija)

Odobrenje za izgradnju skladišta za smještaj eksplozivnih materija izdaje općinski organ uprave, odnosno grada nadležan za poslove građenja.

Član 100.

(Odobrenje za upotrebu skladišta za smještaj eksplozivnih materija)

(1) Upotrebu skladišta za smještaj eksplozivnih materija odobrava organ uprave koji je izdao odobrenje za izgradnju.

(2) Odobrenje se može izdati nakon izvršenog tehničkog pregleda, s tim da u tijelu koji vrši tehnički pregled skladišta mora biti imenovan i inspektor za zaštitu od požara i eksplozija.

(3) U odobrenju o upotrebi skladišta iz stava (1) ovog člana određuju se koje vrste eksplozivnih materija i u kojim količinama se mogu smještati u skladišta.

Član 101.

(Držanje eksplozivnih materija u drugim privremenim skladištima)

Pravna lica čija djelatnost zahtijeva upotrebu eksplozivnih materija mogu te materije, u količini do 2.000 kg, za potrebe izvođenja radova, odnosno za obavljanje druge odgovarajuće djelatnosti držati u kontejnerima ili drugim privremenim skladištima (u daljnjem tekstu: privremena skladišta), koja su za to izgrađena i koja ispunjavaju propisane uvjete.

Član 102.

(Privremeno skladište)

(1) Privremeno skladište može se postaviti samo na mjesto za koje je izdalo odobrenje kantonalno ministarstvo uz prethodno pribavljeno mišljenje općinskog, odnosno gradskog organa uprave nadležnog za poslove građenja.

(2) Rješenjem kojim se odobrava postavljanje privremenog skladišta određuje se i rok do kojeg se u njemu na odobrenom mjestu mogu držati eksplozivne materije. Ovaj rok ne može biti duži od četiri godine, a na zahtjev zainteresovanog pravnog lica može se produžiti prema potrebi za još četiri godine.

Član 103.

(Održavanje privremenih skladišta u skladu sa tehničkim normativima)

Pravna lica koja koriste privremeno skladište dužna su objekat, uređaje i instalacije u njemu, kao i zaštitnu zonu, održavati prema propisanim tehničkim normativima.

Član 104.

(Objekti u kojima se nalaze eksplozivne materije)

(1) Poslovni objekti u kojima se nalaze eksplozivne materije moraju biti sagrađeni od vatrootpornog materijala, osigurani od provala i snabdjeveni masivnom metalnom kasom u kojoj se čuvaju eksplozivne materije van radnog vremena.

(2) U poslovnim objektima u kojima se pored eksplozivnih materija obavlja prodaja i druge robe, dio prostora koji je namijenjen za eksplozivne materije mora biti odvojen od ostalog prostora pregradom ili zidom i vidno obilježen.

(3) Smještaj i čuvanje eksplozivnih materija u poslovnim objektima mora biti u skladu sa tehničkim normativama i uputstvom proizvođača.

Član 105.

(Ovlaštenje za donošenje propisa za provođenje sigurnosnih mjera kod skladištenja eksplozivnih materija)

Federalni ministar propisat će uvjete i način provođenja sigurnosnih mjera kod skladištenja eksplozivnih materija te druga pitanja koja se odnose na skladištenje eksplozivnih materija.

V - ZAPALJIVE TEČNOSTI I GASOVI

1. Skladištenje, držanje i promet zapaljivih tečnosti i gasova

Član 106.

(Skladištenje, držanje i promet zapaljivih tečnosti i gasova)

(1) Pravno lice dužno je da skladištenje, držanje i promet zapaljivih tečnosti i gasova obavlja u izgrađenim ili rekonstruisanim objektima ili djelovima objekata, kao i prostorima uređenim za skladištenje, držanje i promet tih materija, u skladu sa tehničkim propisima.

(2) Zapaljive tečnosti i gasovi moraju da se drže u rezervoarima, posudama, bocama ili bočicama koji odgovaraju tehničkim zahtjevima i na način propisan tehničkim propisima za određenu vrstu zapaljivih tečnosti, odnosno gasova.

(3) Tehničke propise iz st. (1) i (2) ovog člana donosi nadležan organ Bosne i Hercegovine.

Član 107.

(Odobrenje za postavljanje postorijenja i uređaja za korištenje zapaljivih tečnosti i gasova)

(1) Postrojenja i uređaji za korištenje zapaljivih tečnosti i gasova mogu se postavljati i koristiti samo ako odgovaraju tehničkim zahtjevima i propisima utvrđenim u članu 106. ovog zakona.

(2) Postavljanje i upotrebu postrojenja i uređaja iz stava (1) ovog člana, a za čije postavljanje i upotrebu nije predviđeno odobrenje za građenje koje se izdaje u skladu sa propisima o građenju, pravno lice je dužno da za postavljanje i upotrebu tih postrojenja i uređaja prethodno pribaviti saglasnost koju izdaje kantonalno

ministarstvo, na osnovu prethodno pribavljenog mišljenja od općinske, odnosno gradske službe za poslove za urbanizam i građenja.

(3) Uz zahtjev za izdavanje saglasnosti iz stava (2) ovog člana pravno lice je dužno da dostavi tehničku dokumentaciju koja se odnosi na postrojenja i uređaje koji se postavljaju.

(4) Saglasnost iz stava (2) ovog člana izdaje se u vidu rješenja na koje se može izjaviti žalba Federalnom ministarstvu u roku od osam dana od dana prijema rješenja.

(5) Na rješenje Federalnog ministarstva kojim je odlučeno po žalbi iz stava (4) ovog člana može se pokrenuti upravni spor kod nadležnog kantonalnog suda.

Član 108.

(Skladišta i objekti za promet zapaljivih tečnosti i gasova)

(1) Skladišta i objekti za promet zapaljivih tečnosti i gasova mogu da se grade samo na površinama koje su za tu namjenu određene planskim dokumentima i moraju da budu opremljeni tako da je osigurana zaštita života, zdravlja i sigurnosti ljudi, životinja i biljaka, odnosno zaštita životne sredine i imovine.

(2) Skladišta i objekti iz stava (1) ovog člana mogu da se grade i rekonstruišu samo na način kojim se ne stvara opasnost od eksplozija i izbijanja i širenja požara, kao i na sigurnoj udaljenosti od naseljenog mjesta, javnih puteva, željezničkih pruga, dalekovoda niskog napona i drugih važnih objekata koje mogu ugrožavati.

(3) Mjere sigurnosti, u smislu st. (1) i (2) ovog člana, utvrđuje federalni ministar u saradnji sa federalnim ministrom energije, rudarstva i industrije.

Član 109.

(Zabrana izgradnje drugih objekata u zonama opasnosti)

U zonama koje ugrožavaju objekti iz člana 106. ovog zakona nije dozvoljena izgradnja drugih objekata, izuzev onih koji služe sigurnosti skladišta i objekata za držanje i promet zapaljivih tečnosti i gasova.

Član 110.

(Oznake zabrane i upozorenja)

(1) U zonama opasnosti zabranjeno je:

a) držanje materija i uređaja koji mogu da prouzrokuju požar ili omoguće njegovo širenje;

b) držanje otvorenog plamena ili rad s otvorenim plamenom (zavarivanje i dr.) i rad s užarenim predmetima;

c) pušenje i upotreba sredstava za paljenje (šibica, upaljači i dr.);

ć) upotreba uređaja i sredstava koji imaju vatreno ložište;

č) rad s alatom ili uređajem koji varniči;

d) postavljanje nadzemnih električnih vodova, bez obzira na napon;

đ) pristup vozilima koja prilikom rada pogonskog uređaja mogu izbacivati varnice;

dž) nošenje mobitela, odjeće i obuće koji skupljaju statički elektricitet i upotreba uređaja i opreme koji nisu propisno zaštićeni od statičkog elektriciteta.

(2) Pravna lica dužna su na skladištima i objektima u kojima drže ili obavljaju promet zapaljivih tečnosti i gasova, na vidnim mjestima, postaviti natpise koji upozoravaju na zabrane iz stava (1) ovog člana, oznake opasnosti od eksplozija, izbijanja i širenja požara i uputstvo o postupanjima u slučaju eksplozija i požara.

Član 111.

(Dostavljanje planskog dokumenta radi davanja mišljenja)

U postupku izrade nacrt planskog dokumenta za skladišta i objekte u kojima se obavlja promet zapaljivih tečnosti i gasova (zapaljivih tečnosti kapaciteta iznad 1.000 m³, zapaljivih gasova kapaciteta iznad 30 m³ i zapaljivih gasova u bocama kapaciteta iznad 5.000 kg), nosilac pripremnih poslova je obavezan da dostavi nacrt planskog dokumenta na mišljenje Federalnom ministarstvu, a za skladišta i objekte u kojima se obavlja promet zapaljivih tečnosti i gasova (zapaljivih tečnosti kapaciteta do 1.000 m³, zapaljivih gasova kapaciteta do 30 m³ i zapaljivih gasova u bocama kapaciteta do 5.000 kg nacrt planskog dokumenta dostavlja se na mišljenje kantonalnom ministarstvu.

Član 112.

(Saglasnost na lokaciju i tehničku dokumentaciju)

(1) Prilikom izgradnje ili rekonstrukcije objekata iz člana 108. ovog zakona, investitor je dužan da pribavi saglasnost kantonalnog ministarstva, u pogledu zaštite od eksplozija i izbijanja i širenja požara.

(2) Saglasnost iz stava (1) ovog člana daje se na lokaciju objekta i tehničku dokumentaciju za izgradnju i rekonstrukciju skladišta i objekata za promet zapaljivih tečnosti i gasova.

Član 113.
(Zagrijavanje)

Objekti iz člana 106. ovog zakona, po pravilu, ne zagrijavaju se, a ukoliko je zagrijavanje određenih prostorija neophodno, vrši se u skladu sa tehničkim propisima iz člana 106. stav (3) ovog zakona.

Član 114.
(Aparati, uređaji i instalacije)

(1) Objekti iz člana 108. ovog zakona moraju:

a) biti snabdjeveni aparatima ili drugim uređajima za gašenje požara, hidrantskom mrežom te uređajima za detekciju zapaljivih gasova;

b) imati instalacije za osvjetljavanje tih objekata i prostora oko njih, a ako su nadzemni, i posebne uređaje za hlađenje i gromobransku instalaciju, u skladu sa zakonom i tehničkim propisima iz člana 106. stav (3) ovog zakona.

(2) Pravna lica koja koriste objekte iz člana 108. ovog zakona dužna su da se staraju o ispravnosti aparata, uređaja i instalacija iz stava (1) ovog člana.

Član 115.
(Provjetravanje)

(1) Objekti iz člana 108. ovog zakona moraju imati prirodno provjetravanje a, po potrebi, i vještačko.

(2) Otvori za provjetravanje objekata iz stava (1) ovog člana moraju biti izgrađeni tako da kroz njih ne može prodirati voda i da se ne mogu sami zatvoriti ili začepiti.

Član 116.
(Uvjeti za upotrebu objekata)

(1) Upotreba objekata iz člana 108. ovog zakona dozvoljena je nakon što pravno lice dobije odobrenje za izgradnju koje se izdaje u skladu sa propisima o građenju.

(2) Odobrenje iz stava (1) ovog člana može se izdati nakon izvršenog tehničkog pregleda, s tim da u tijelu koje obavlja tehnički pregled skladišta mora biti imenovan i federalni inspektor za zaštitu od požara i eksplozija za objekte zapaljivih tečnosti kapaciteta iznad 1.000 m³, zapaljivih gasova kapaciteta iznad 30 m³ i zapaljivih gasova u bocama kapaciteta iznad 5.000 kg, odnosno kantonalni inspektor za zaštitu od požara i eksplozija za objekte zapaljivih tečnosti kapaciteta do 1.000 m³, zapaljivih gasova kapaciteta do 30 m³ i zapaljivih gasova u bocama kapaciteta do 5.000 kg.

Član 117.
(Odgovornost za štetu)

Pravno lica koje obavlja skladištenje i promet zapaljivih tečnosti i gasova odgovara za štetu koja nastane trećim licima, a koja proizlazi iz njihovog rada i ugovorenih obaveza.

2. Stavljanje u promet zapaljivih tečnosti i gasova

2.1 Promet zapaljivih tečnosti

Član 118.
(Uvjeti za stavljanje u promet zapaljivih tečnosti)

(1) Pravno lice dužno je da prije stavljanja u promet zapaljivih tečnosti utvrdi grupu zapaljive tečnosti prema temperaturi zapaljivosti, kategoriji i stepenu opasnosti od eksplozija i izbijanja i širenja požara u skladu sa tehničkim propisima iz člana 106. stav (3) ovog zakona i da izradi uputstvo za sigurno skladištenje, držanje i promet zapaljivih tečnosti.

(2) Na rezervoarima, posudama, bocama ili bočicama koje sadrže zapaljive tečnosti, prilikom stavljanja u promet moraju da budu ispisani podaci o vrsti i zapremini zapaljive tečnosti, nazivu proizvođača ili distributera, kao i podaci iz stava (1) ovog člana, na kvalitetno odštampanoj i vidno zalijepljenoj naljepnici ili odštampani na samom rezervoaru, posudama, boci ili bočici, osim ako sadrže zapaljive tečnosti namijenjene za prehranu.

Član 119.
(Materijal za izradu rezervoara, posuda, boca i bočica)

Rezervoari, posude, boce i bočice koji služe za držanje zapaljive tečnosti moraju da budu izrađeni od materijala otpornog na tečnost koju sadrže, označeni jasnim znacima opasnosti od eksplozija, izbijanja i širenja požara i tekstom upozorenja za sigurno držanje i upotrebu, na način propisan tehničkim propisima iz člana 106. stav (3) ovog zakona.

Član 120.
(Podaci o grupi zapaljive tečnosti)

Pravno lice koje se bavi skladištenjem i prometom zapaljivih tečnosti, osim zapaljivih tečnosti općepoznatih osobina, dužno je da ima podatke o grupi zapaljive tečnosti prema temperaturi zapaljivosti, kategoriji i stepenu opasnosti od eksplozija i izbijanja i širenja požara, u skladu sa tehničkim propisima iz člana 106. stav (3) ovog zakona.

2. 2. Promet zapaljivih gasova

Član 121.

(Uvjeti za stavljanje u promet zapaljivih gasova)

(1) Pravno lice dužno je da prije stavljanja u promet zapaljivih gasova uz rezervoare, posude, boce i bočice izradi pisano uputstvo za sigurno skladištenje, držanje i promet, sa podacima o vrsti i zapremini gasa, kao i o kategoriji i stepenu opasnosti od eksplozija i izbijanja i širenja požara, u skladu sa tehničkim propisima iz člana 106. stav (3) ovog zakona.

(2) Rezervoari i posude koje sadrže zapaljive gasove moraju da budu označene, obojene i izrađene od materijala, u skladu sa tehničkim propisima iz člana 106. stav (3) ovog zakona, s tim da se rezervoari i posude moraju prije i u toku upotrebe kontrolisati na način i u rokovima određenim tim propisima.

(3) Boce i bočice koje sadrže zapaljive gasove moraju da budu izrađene od materijala otpornog na zapaljivi gas koji sadrže i označene jasnim oznakama opasnosti od požara i tekstom upozorenja za sigurno držanje i upotrebu.

Član 122.

(Podaci o vrsti i stepenu opasnosti)

Pravno lice koje vrši skladištenje ili promet zapaljivih gasova, osim zapaljivih gasova općepoznatih osobina, dužno je da ima podatke o vrsti i stepenu opasnosti od eksplozija i izbijanja i širenja požara, u skladu sa tehničkim propisima iz člana 106. stav (3) ovog zakona.

Član 123.

(Ispitivanje instalacija za gas)

(1) Instalacija za gas u objektu ili dijelu objekta mora da bude izvedena u skladu sa projektom instalacije za gas izrađenom prema tehničkim propisima iz člana 106. stav (3) ovog zakona, odnosno pravilima tehničke prakse.

(2) Prije puštanja u rad, instalacija za gas u objektu ili dijelu objekta mora da se ispita u pogledu ispravnosti i nepropustljivosti, u skladu sa projektom instalacije za gas, o čemu mora postojati dokumentacija.

(3) Distributer je dužan da ispita ispravnost i nepropustljivost instalacije za gas od uličnog priključka, odnosno rezervoara gasa do uređaja u objektu ili dijelu objekta za stanovanje, najmanje jednom u pet godina prilikom promjene, odnosno baždarenja gasometra, ako drugim propisom nije određen kraći rok.

(4) Organi državne i lokalne uprave, pravna lica i druga lica koji koriste zapaljive gasove za zagrijavanje radnih prostora ili u tehnološkom procesu dužni su

da omoguće distributeru gasa nesmetano ispitivanje ispravnosti i nepropustljivosti instalacije za gas od uličnog priključka, odnosno od rezervoara do uređaja, najmanje jednom u pet godina, ako drugim propisom nije određen kraći rok.

(5) O ispravnosti i nepropustljivosti ispitane instalacije za gas uvjerenje izdaje distributer.

Član 124.

(Obustavljanje isporuke gasa)

Ako se u postupku ispitivanja ispravnosti i nepropustljivosti instalacija za gas iz člana 123. ovog zakona utvrdi da instalacija nije ispravna, da propušta gas ili nije izvedena u skladu sa projektom, odnosno tehničkim propisima, distributer je dužan da obustavi isporuku gasa potrošaču kod koga su utvrđeni nedostaci, do njihovog otklanjanja.

Član 125.

(Ovlaštenje za donošenje propisa o ukapljenom naftnom gasu)

Federalni ministar će u saradnji sa federalnim ministrom rudarstva, energije i industrije i federalnog ministra prostornog uređenja propisati uvjete i mjere zaštite od požara i eksplozija prilikom izgradnje građevina i postrojenja te način skladištenja, držanja i prometa ukapljenog naftnog gasa.

2.3. Prodaja zapaljivih tečnosti i gasova

Član 126.

(Prodaja u prodajnim objektima)

(1) Zapaljive tečnosti i gasovi u posudama, bocama i bočicama mogu se prodavati samo u prodajnim objektima zapaljivih tečnosti i gasova.

(2) Izuzetno, prodaja zapaljivih tečnosti i gasova u bočicama može se obavljati izvan prodajnih objekata zapaljivih tečnosti i gasova ako njihova ukupna zapremina ne prelazi 20 l.

Član 127.

(Prodaja u originalnom pakovanju)

U prodajnim objektima mogu se prodavati zapaljive tečnosti i gasovi samo u originalnom i neoštećenom pakovanju.

VI - EVIDENCIJE I IZVJEŠTAVANJA

Član 128.

(Evidencije koje vodi Federalno ministarstvo)

Federalno ministarstvo vodi evidencije o:

- a) eksplozivnim materijama stavljenim u promet;
- b) pravnim licima ovlaštenim za proizvodnju eksplozivnih materija;
- c) pravnim licima ovlaštenim za promet eksplozivnih materija;
- č) pravnim licima ovlaštenim za izvođenje vatrometa;
- ć) pravnim licima ovlaštenim za izvođenje glasnog pucnja.

Član 129.

(Evidencije koje vode kantonalna ministarstva)

Kantonalna ministarstva unutrašnjih poslova vode evidencije o:

- a) izdatim odobrenjima za maloprodaju pirotehničkih sredstava;
- b) mjestima za izvođenje javnog vatrometa i glasnog pucnja;
- c) izdatim odobrenjima za upotrebu kontejnera;
- d) izdatim odobrenjima za nabavku eksplozivnih materija.

Član 130.

(Evidencije koje vodi pravno lice)

(1) Pravno lice koje proizvodi eksplozivne materije vodi evidencije o:

- a) nabavljenim i utrošenim količinama sirovina za proizvodnju eksplozivne materije,
- b) vrsti i količini proizvedenih, utrošenih i uništenih eksplozivnih materija.

(2) Pravno lice koji obavlja promet, odnosno nabavlja i upotrebljava eksplozivne materije vodi evidencije o količini i vrsti nabavljenih, prodatih, upotrijebljenih, uništenih ili otuđenih eksplozivnih materija.

Član 131.

(Ovlaštenje za donošenje propisa o evidencijama)

Federalni ministar propisat će sadržaj, izgled i način vođenja evidencija iz čl.: 128., 129. i 130. ovog zakona.

Član 132.

(Izvještaj)

(1) Federalno ministarstvo je dužno da pripremi godišnji izvještaj o provođenju ovog zakona koji dostavlja Vladi Federacije.

(2) Izvještaj iz stava (1) ovog člana priprema se na osnovu izvještaja iz člana 46. ovog zakona i izvještaja koji dostave kantonalna ministarstva.

VII - NADZOR NAD PROVOĐENJEM OVOG ZAKONA

Član 133.

(Organ uprave koji obavlja poslove nadzora nad provođenjem Zakona)

(1) Nadzor nad provođenjem ovog zakona vrši Federalno ministarstvo.

(2) Nadzor iz stava (1) ovog člana vrši se neposrednim uvidom i nadzorom nad proizvodnjom, prometom, skladištenjem, ispitivanjem, upotrebom, neutralizacijom i uništavanjem eksplozivnih materija, zapaljivih tečnosti i gasova.

(3) Poslovi neposrednog nadzora i uvoda iz stava (2) ovog člana obuhvataju kontrolu uvjeta za proizvodnju, promet, skladištenje, ispitivanje, upotrebu, neutralizaciju i uništavanje eksplozivnih materija, zapaljivih tečnosti i gasova.

Član 134.

(Inspekcijski nadzor nad provođenjem zakona)

Inspekcijski nadzor nad provođenjem zaštitnih i drugih sigurnosnih mjera radi zaštite od požara i eksplozija obavljaju inspektori za zaštitu od požara i eksplozija Federalnog ministarstva i kantonalnih ministarstava.

Član 135.

(Pitanja koja su predmet inspekcijskog nadzora)

(1) Federalno ministarstvo i kantonalno ministarstvo obavljaju poslove inspekcijskog nadzora u vezi sa provođenjem zaštitnih i drugih sigurnosnih mjera određenih ovim zakonom, podzakonskim propisima donesenim na osnovu ovog zakona, kao pravilima i propisima tehničke prakse.

(2) Inspekcijski nadzor iz stava (1) ovog člana odnosi se na sljedeća pitanja:

a) kontrola zakonitog i pravilnog provođenje postupka proizvodnje eksplozivnih materija, zapaljivih tečnosti i gasova;

b) kontrola prometa eksplozivnih materija i zapaljivih tečnosti i gasova;

c) usaglašenost eksplozivnih materija sa tehničkim zahtjevima;

d) provođenje obuke i osposobljavanja lica koja rukuju eksplozivnim materijama, zapaljivim tečnostima i gasovima.

Član 136.

(Mjere koje nalaže inspektor u toku inspekcijskog nadzora)

(1) Radi sprečavanja izbijanja požara i nastanka eksplozije u toku proizvodnje, prometa, skladištenja i upotrebe eksplozivnih materija, inspektor za zaštitu od požara ima pravo narediti sljedeće mjere:

- a) otklanjanje utvrđenih nepravilnosti i odrediti rok za njihovo otklanjanje;
- b) zabraniti upotrebu skladišta koje ne ispunjava uvjete propisane ovim zakonom i propise donesene na osnovu ovog zakona;
- c) zabraniti promet eksplozivnih materija ako njihov promet ili upotreba dovodi ili može dovesti u opasnost život, zdravlje i sigurnost ljudi, materijalnih dobara i čovjekove okoline;
- d) zabraniti promet i upotrebu eksplozivnih materija koje nisu u odgovarajućoj ambalaži ili ambalaža nije označena na propisan način;
- e) zabraniti proizvodnju eksplozivnih materija u slučajevima:
 - ako se proizvodnja ne odvija prema odobrenoj dokumentaciji, tehničkim propisima, standardima i normativima, što može dovesti u pitanje sigurnost života, zdravlja i sigurnosti ljudi, materijalnih dobara i čovjekove okoline,
 - ako u određenom roku nisu provedene naložene mjere;
- f) zabraniti manipulaciju s eksplozivnim materijama licima koja za to nisu stručno osposobljena;
- g) zabraniti utovar i istovar eksplozivnih materija na pretovarnim mjestima ukoliko nisu poduzete propisane i naložene sigurnosne mjere;
- h) oduzeti eksplozivne materije ukoliko se drže ili upotrebljavaju protivno odredbama ovog zakona.

(2) Zabrane iz stava (1) tač. b) do g) ovog člana izriču se rješenjem za vrijeme dok se utvrđeni nedostaci ne otklone.

(3) Protiv rješenja iz stava (2) ovog člana može se izjaviti žalba Federalnom ministarstvu u roku od osam dana od dana prijema rješenja.

(4) Žalba ne odlaže izvršenje rješenja.

(5) Federalno ministarstvo dužno je donijeti rješenje po žalbi iz stava (2) ovog člana u roku od 10 dana od dana prijema žalbe.

Član 137.

(Lica koja provode inspekcijski nadzor)

(1) Poslove inspekcijskog nadzora iz člana 135. ovog zakona iz nadležnosti Federalnog ministarstva obavljaju federalni inspektori za zaštitu od požara, a iz nadležnosti KMUP-a kantonalni inspektori za zaštitu od požara (u daljnjem tekstu: inspektori).

(2) Inspektor iz stava (1) ovog člana može biti lice koje ispunjava uvjete za inspektora za zaštiti od požara utvrđene Zakonom o zaštiti od požara i vatrogastvu („Službene novine Federacije BiH“, broj 64/09).

Član 138.

(Ovlaštenje za donošenje propisa o inspekcijskom nadzoru)

(3) Ministar će propisati sadržaj i načinu obavljanja poslova inspekcijskog nadzora iz člana 137. ovog zakona, kao i druga pitanja koja se odnose na inspekcijski nadzor.

VIII - KAZNENE ODREDBE

Član 139.

Novčanom kaznom u iznosu od 15.000,00 KM do 30.000,00 KM kaznit će se za prekršaj pravno lice ako:

a) ne preduzima sigurnosne mjere i radnje propisane ovim zakonom i podzakonskim propisima donesenim na osnovu ovog zakona, odnosno mjere i radnje utvrđene drugim zakonima i podzakonskim propisima kada dođu dodir s eksplozivnim materijama, zapaljivim tečnostima i gasovima (član 2.).

b) objekte koje koristi ili koje će koristiti za proizvodnju, promet i upotrebu eksplozivnih materija te promet zapaljivim tečnostima i gasovima ne gradi, koristi i održava u skladu sa Zakonom o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br.: 2/06, 72/07, 32/08, 4/10, 13/10 i 45/10), i odgovarajućim kantonalnim propisima koji regulišu gradnju i prostorno uređenje i ne pridržava se odredbi Zakona o zaštiti prirode („Službene novine Federacije BiH“, broj 66/13) te odgovarajućih kantonalnih propisa koji regulišu zaštitu okoliša (član 8.);

c) pakovanje eksplozivnih materija i zapaljivih tečnosti i gasova ne vrši u skladu sa propisanim tehničkim normama i međunarodnim standardima i preporukama utvrđenim u propisima o prevozu opasnih materija (član 18. stav (1);

ć) ambalaža i paketi, kao i svako pojedinačno pakovanje eksplozivnih materija i zapaljivih tečnosti i gasova nema oznaku serije, serijski broj i godinu proizvodnje (član 18. stav (2));

č) uz ambalažu i pakovanje eksplozivnih materija i zapaljivih tečnosti i gasova nije priloženo uputstvo za sigurnu upotrebu i način uništavanja eksplozivne materije i zapaljive tečnosti i gasova i ambalaže član 18. stav (3);

d) upotrijebljene eksplozivne materije i zapaljive tečnosti i gasovi nisu zbrinuti u skladu s uputstvom proizvođača ili uputstvom pravnog lica od kojeg su nabavili eksplozivne materije, odnosno zapaljive tečnosti i gasove (član 18. stav (4));

đ) se ambalaža koja je namijenjena za pakovanje eksplozivnih materija, zapaljivih tečnosti i gasova koristi u druge svrhe, odnosno ne koristi se u svrhu

pakovanja onih eksplozivnih materija, zapaljivih tečnosti i gasova za koje je ambalaža namijenjena (član 18. stav (5));

dž) eksplozivne materije ne prevozi ili stavlja u promet i upotrebu u izvornoj ambalaži, koja je ispitana i označena (član 18. stav (6));

e) se na ambalaži ne nalaze podaci o datumu proizvodnje i rok upotrebe eksplozivne materije, uputstvo za upotrebu, posebno upozorenje, ako ga ima, i oznaka razreda za pirotehničko sredstvo (član 18. stav (7));

f) obavlja prodaju ili upotrebu eksplozivnih materija kada je federalni ministar iz sigurnosnih razloga zabranio prodaju ili upotrebu pojedinih eksplozivnih materija (član 23. stav (2));

g) stavlja u promet eksplozivne materije prije nego što je ta materija ispitana (član 29. stav (1));

h) ispitivanje eksplozivne materije obavlja pravno lice koje nije ovlastilo nadležno ministarstvo Bosne i Hercegovine (član 29. stav (2));

i) prije otpočinjanja serijske proizvodnje nije proizveo određenu količinu eksplozivne materije radi njenog ispitivanja, a u svrhu stavljanja u promet i upotrebu (član 30. stav (2));

j) je eksplozivna materija stavljena na tržište u promet i upotrebu bez odobrenja za stavljanje u promet eksplozivne materije (član 31. stav (1));

k) ne dozvoljava Federalnom ministarstvu uzimanje uzoraka eksplozivnih materija koje su u prometu radi provjeravanja usaglašenosti (član 34. stav (1));

l) obavlja promet eksplozivnih materija kada je Federalno ministarstvo privremeno zabranilo promet eksplozivnih materija do utvrđivanja usaglašenosti (član 34. stav (2));

lj) u roku od 30 dana od dana prijema obavijesti o zabrani prometa eksplozivnih materija kada uzeti uzorak koji ne odgovara propisanim tehničkim zahtjevima ne uništi ili ne vrati proizvođaču (član 34. stav (3));

nj) se bavi proizvodnjom eksplozivnih materija a da nije registrovano za obavljanje te djelatnosti kod nadležnog suda i nema odobrenje za proizvodnju eksplozivnih materija (član 35. stav (1));

m) započne proizvodnju eksplozivnih materija prije dobijanja odobrenja za proizvodnju eksplozivne materije (član 35. stav (2));

n) pakuje i skladišti eksplozivnu materiju koju je proizveo na mjestu upotrebe (član 39. stav (3));

o) na mjestu upotrebe, odnosno na lokaciji radilišta proizvodi eksplozivne materije koje nisu obuhvaćene članom 40. ovog zakona;

p) eksplozivne materije nabavlja bez odobrenja za njihovu nabavku (član 50. stav (1));

r) prevoz opasne eksplozivne materije obavlja bez odobrenja iz člana 57. ovog zakona;

s) ne vrati neupotrijebljenu eksplozivnu materiju i neupotrebljivu ambalažu u kojoj su bile upakovane eksplozivne materije pravnom licu od kojeg ih je nabavilo ili ne uništi u skladu s uputstvom proizvođača (član 62. stav (1));

š) poslove miniranja obavlja bez odobrenja iz člana 67. stav (1) ovog zakona;

t) eksplozivne materije ne uništava u skladu s uputstvom proizvođača na mjestima gdje je dozvoljena upotreba eksplozivnih materija (član 92. stav (1));

u) eksplozivne materije uništavaju lica koja nisu stručno osposobljena za rukovanje eksplozivnih materija (član 92. stav (2));

v) se uništavanje eksplozivnih materija ne vrši na lokaciji koju je odredilo kantonalno ministarstvo (član 92. stav (3));

z) ne drži eksplozivne materije u skladištu za smještaj eksplozivne materije koje u pogledu vrste i količine nije u skladu sa rješenjem kojim je odobrena upotreba odnosno skladišta (član 95. stav (2));

ž) skladišta za smještaj eksplozivne materije nisu izvan naseljenih mjesta i dovoljno udaljena od javnih cesta, željezničkih pruga i dalekovoda visokog napona, odnosno odvojena od tih objekata zaštitnim grudobranom ili zidom koji pruža punu zaštitu od eksplozije i požara (član 96.);

q) smještaj i čuvanje eksplozivnih materija u poslovnim objektima ne obavlja u skladu sa tehničkim normativama i uputstvom proizvođača (član 104. stav (3));

y) skladištenje, držanje i promet zapaljivih tečnosti i gasova ne obavlja u izgrađenim ili rekonstruisanim objektima ili djelovima objekata, kao i na prostorima uređenim za skladištenje, držanje i promet tih materija, u skladu sa tehničkim propisima (član 101. stav (6));

x) zapaljive tečnosti i gasove ne drži u rezervoarima, posudama, bocama ili bočicama koji odgovaraju tehničkim zahtjevima i na način propisan tehničkim propisima za određenu vrstu zapaljivih tečnosti, odnosno gasova (član 106. stav (2));

aa) u zonama opasnosti ne poštuju mjere i radnje utvrđene u članu 110. stav (1) ovog zakona;

ab) objekti za skladištenje i promet zapaljivih tečnosti i gasova nisu snabdjeveni aparatima, uređajima i instalacijama i ne održavaju se u skladu sa članom 108. ovog zakona;

ac) koristi objekte za skladištenje i promet zapaljivih tečnosti i gasova prije dobijanja odobrenja za izgradnju i izvršenog tehničkog pregleda (član 116.);

ać) prije stavljanja u promet zapaljivih gasova uz rezervoare, posude, boce i bočice ne izradi pisano uputstvo za sigurno skladištenje, držanje i promet sa podacima o vrsti i zapremini gasa, kao i o kategoriji i stepenu opasnosti od eksplozija i izbijanja i širenja požara (član 121. stav (1));

ač) rezervoari i posude koje sadrže zapaljive gasove nisu označeni, obojeni i izrađeni od materijala, u skladu sa tehničkim propisima iz člana 106. stav (3) ovog zakona i da rezervoari i posude prije i u toku upotrebe nisu kontrolisani na način i u rokovima određenim u tehničkim propisima (član 121. stav (2));

ad) boce i bočice koje sadrže zapaljive gasove nisu izrađene od materijala otpornog na zapaljivi gas koje sadrže i ako nisu označene jasnim oznakama opasnosti od požara i tekstom upozorenja za sigurno držanje i upotrebu (član 121. stav (3));

ad) nemaju podatke o vrsti i stepenu opasnosti od eksplozija i izbijanja i širenja požara (član 122);

adž) instalacija za gas u objektu ili dijelu objekta nije izvedena u skladu sa projektom instalacije za gas izrađenom prema tehničkim propisima iz člana 106. stav (3) ovog zakona, odnosno pravilima tehničke prakse i prije puštanja u rad, nije ispitana u pogledu ispravnosti i nepropustljivosti, u skladu sa projektom instalacije za gas, o čemu mora postojati dokumentacija (član 123. st. (1) i (2));

ae) ne ispita ispravnost i nepropustljivost instalacije za gas od uličnog priključka, odnosno rezervoara gasa do uređaja u objektu ili dijelu objekta za stanovanje najmanje jednom u pet godina prilikom promjene, odnosno baždarenja gasometra (član 123. stav (3));

af) u prodajnim objektima ne prodaje zapaljive tečnosti i gasove u originalnom i neoštećenom pakovanju (član 127).

Za prekršaje iz stava (1) ovog člana kaznit će se i odgovorno lice u pravnom licu novčanom kaznom u iznosu od 300,00 KM do 5.000,00 KM.

Član 140.

Novčanom kaznom u iznosu od 5.000,00 KM do 15.000,00 KM kaznit će se za prekršaj pravno lice ako:

a) rukovanje eksplozivnim materijama i zapaljivim tečnostima i gasovima obavlja lice koje ne ispunjava uvjete iz člana 13. ovog zakona;

b) ne odredi odgovorno lice koji će pratiti proces proizvodnje, prometa i upotrebe eksplozivnih materija i zapaljivih tečnosti i gasova i ako to lice nije u radnom odnosu (član 14. stav (1));

c) za odgovorno lice odredi lice koje ne ispunjava uvjete iz člana 14. stav (2) ovog zakona;

ć) poslove stručnog osposobljavanja i usavršavanja povjeri pravnom licu koje ne posjeduje ovlaštenje kantonalnog ministarstva (član 15. stav (2));

č) ne organizuje i trajno ne obavlja kontrolu provođenja preventivnih i drugih mjera u toku proizvodnje, prometa, ispitivanja, upotrebe, skladištenja i uništavanja eksplozivnih materija, zapaljivih tečnosti i gasova (član 17. st. (1) i (2));

d) ne izraditi plan sigurnosti u vezi s postupanjem u slučaju nastanka nesreće ili drugih vanrednih događaja (eksplozija, požar, krađa i sl.), (član 19. stav (1));

đ) na mjestima na kojima se obavlja proizvodnja, promet, upotreba i skladištenje eksplozivnih materija, zapaljivih tečnosti i gasova ne provodi mjere zaštite tih mjesta u skladu sa Zakonom o agencijama i unutrašnjim službama za zaštitu ljudi i imovine („Službene novine Federacije BiH“, br. 78/08 i 67/13), (član 20.);

dž) ne obavijesti najbližu policijsku upravu ili policijsku stanicu kantonalnog ministarstva odmah po saznanju o gubitku, nestanku ili krađi eksplozivnih materija, zapaljivih tečnosti i gasova (član 21.);

e) upotrebljava eksploziv koji se proizvodi na mjestu upotrebe na lokaciji radilišta izvan lokacije na kojoj se proizvodi (član 39. stav (1));

f) proizvedenu eksplozivnu materiju na mjestu upotrebe trenutno i neposredno ne upotrijebi sipanjem unaprijed pripremljene minske bušotine na mjestu upotrebe, odnosno lokaciji radilišta (član 39. stav (2));

g) za svaku eksplozivnu materiju koju proizvodi nema dokument o ocjeni usaglašenosti sa tehničkim zahtjevima, tehničku specifikaciju i uputstvo o upotrebi, skladištenju i uništavanju eksplozivnih materija (član 42. stav (1));

h) za pirotehnička sredstva koja proizvodi nema dokument o ocjeni usaglašenosti sa tehničkim zahtjevima, tehničku specifikaciju i uputstvo o upotrebi, skladištenju i uništavanju pirotehničkih sredstava i oznaku razreda proizvodnje (član 42. stav (2));

i) objekat u kojima se proizvode eksplozivne materije nije osiguran 24-satnim nadzorom putem fizičke i/ili tehničke zaštite te nije osiguran potrebnim uređajima i instalacijama za sprečavanje i gašenje požara u skladu sa propisom koji reguliše zaštitu od požara i mora imati gromobransku instalaciju, koja se mora održavati u ispravnom stanju (član 43. stav (1));

j) eksplozivne materije ne smjesti u skladišne objekte (član 43. stav (3));

k) poslove istraživanja novih eksplozivnih materija obavlja bez odobrenja za poslove istraživanja novih eksplozivnih materija (član 45. stav (1));

l) se ne pridržava sigurnosnih i drugih mjera koje u rješenju o odobrenju za nabavku eksplozivne materije odredi kantonalno ministarstvo (član 52. st. (3) i (4));

lj) u toku prevoza eksplozivne materije ne postupi po mjerama sigurnosti utvrđenim u članu 58. st. (2) i (3) ovog zakona;

nj) eksplozivne materije ne upotrebljava na mjestu koje je određeno u odobrenju za nabavku, ukoliko je to mjesto navedeno u odobrenju (član 59. stav (1));

m) nabavljena eksplozivna materija dođe u dodir sa neovlaštenim licem i ne pridržava se uputstva proizvođača o načinu upotrebe, čuvanja te uvjetima smještaja eksplozivne materije (član 59. stav (2));

n) ne povjeri poslove neposredne upotrebe eksplozivnih materija u građevinarstvu licu koje je stručno osposobljeno i koje ima rješenje o obavljanju poslova miniranja (član 60. stav (2));

o) ne vodi nadzor nad minerom u pogledu količine utrošenih eksplozivnih materija (član 61. stav (1));

p) ne preda eksplozivne materije mineru uz potvrdu koja sadrži: datum izdavanja, vrstu i količinu izdatih eksplozivnih materija, vrijeme predviđeno za paljenje (datum i sat), kao i potpis minera (član 61. stav (2));

r) upotrebljava eksplozivne materije za ispitivanje proizvoda za čiju kontrolu kvalitete se koriste eksplozivne materije bez odobrenja za upotrebu eksplozivnih materija radi ispitivanju kvalitete proizvoda (član 63. stav (1));

s) za potrebe spašavanja ljudi i imovine ili za potrebe obuke nabavlja i upotrebljava eksplozivne materije bez odobrenja kantonalnog ministarstva (član 64. stav (1));

š) miniranje ne obavlja prema planu miniranja i po pravilima struke, uz primjenu važeće regulative (član 68. stav (1));

t) ako se miniranje izvodi na radilištima za koje nadležni organ uprave nije izdao odgovarajuće odobrenje zavisno o vrsti radilišta (član 71.);

u) u objektu - kiosku u kojem se obavlja prodaja pirotehničkih sredstava drži više do 20 kg neto težine pirotehničkih sredstva razreda I, a u prodavnici više od 60 kg neto težine pirotehničkih sredstva razreda I (član 74. stav (2));

v) prodaju pirotehničkih sredstava razreda II, III, T1 i P1 u maloprodajnom objektu u kojem se obavlja prodaja oružja i municije ili u specijalizovanim objektima za prodaju pirotehničkih sredstava obavlja mimo perioda utvrđenog u članu 75. stav (1) ovog zakona;

z) pirotehnička sredstva ne drži u prodajnom prostoru i priručnom skladištu (član 75. stav (1));

ž) u maloprodajnom objektu u kojem se obavlja prodaja oružja i municije ili u specijalizovanim objektima u kojima se prodaju pirotehnička sredstva, uključujući prateće prostore i priručno skladište uz objekat u kojem se obavlja prodaja, drži pirotehnička sredstva razreda I, II, III, T1 i P1 u količini većoj od 60 kg neto pirotehničke smjese;

w) prodaje pirotehnička sredstva razreda I licima mlađim od 14 godina (član 76. stav (1));

q) ako prodaje pirotehnička sredstva razreda II licima mlađim od 16 godina, a pirotehnička sredstva razreda III, T1 i P1 licima mlađim od 18 godina (član 76. stav (2));

x) obavlja maloprodaju pirotehničkih sredstava razreda IV, T2 i P2;

y) poslove javnog vatrometa obavlja bez odobrenja za obavljanje javnog vatrometa (član 82. stav (1));

aa) izvođenje javnog vatrometa obavlja bez odobrenja za mjesto i vrijeme izvođenja javnog vatrometa (član 84. stav (1));

ab) izvođenje glasnog pucnja obavlja bez odobrenja za izvođenje glasnog pucnja (član 87. stav (1));

ac) izvođenje glasnog pucnja obavlja bez odobrenja za mjesto i vrijeme izvođenja glasnog pucnja (član 90. stav (1));

ad) objekat, uređaje i instalacije u privremenim skladištima, kao i zaštitnu zonu u okviru privremenih skladišta ne održava prema propisanim tehničkim normativima (član 103);

ae) poslovni objekti u kojima se nalaze eksplozivne materije nisu sagrađeni od vatrootpornog materijala, nisu osigurani od provale niti su snabdjeveni masivnom metalnom kasom u kojoj se čuvaju eksplozivne materije van radnog vremena (član 104. stav (1));

af) u poslovnim objektima u kojima se, pored eksplozivnih materija, obavlja prodaja i druge robe, dio prostora koji je namijenjen za eksplozivne materije nije

odvojen od ostalog prostora pregradom ili zidom niti vidno obilježen (član 104. stav (2));

(2) Za prekršaje iz stava (1) ovog člana kaznit će se i odgovorno lice u pravnom licu novčanom kaznom u iznosu od 200,00 KM do 3.000,00 KM.

Član 141.

Novčanom kaznom u iznosu od 500,00 KM do 10.000,00 KM kaznit će se za prekršaj pravno lice ako:

a) ne osigura kontinuiranu stručno osposobljavanje i usvršavanje za lica koja obavljaju poslove rukovanja eksplozivnim materijama, zapaljivim tečnostima i gasovima (član 15. stav (1));

b) svojim općim aktom nije bliže utvrdilo mjere, radnje te ponašanje radnika radi osiguranja od eksplozije, požara i mogućnosti zloupotrebe (član 17. stav (3));

c) ne upozna sva lica, koja za njega obavljaju radnje s eksplozivnim materijama, zapaljivim tečnostima i gasovima sa mjerama određenim u općim aktima iz člana 17. stav (3) ovog zakona i mjerema utvrđenim u planu za postupanje u slučaju nastanka nesreće ili drugih vanrednih događaja i ne osposobi ih za postupanje u slučaju nastanka nesreće ili drugih vanrednih događaja (član 19. stav (2));

ć) ne obavijesti Federalno ministarstvo, odnosno kantonalno ministarstvo koje je u skladu s odredbama ovog zakona izdalo odobrenje za proizvodnju, promet i upotrebu eksplozivnih materija i drugu vrstu odobrenja, odnosno saglasnosti koje je utvrđeno ovim zakonom, o početku ili prestanku djelatnosti, statusnim promjenama i promjenama uvjeta potrebnih za obavljanje djelatnosti tog pravnog lica, u roku od osam dana od dana nastanka tih promjena (član 22.);

č) u u roku od osam dana od dana prijema rješenja o ukidanju odobrenja za proizvodnju eksplozivnih materija ne dostavi sve evidencije koje je vodilo prema ovom zakonu (član 37. stav (4) i 38. stav (4));

d) ne vodi evidenciju o sirovinama koje ulaze u sastav proizvedene eksplozivne materije (član 42. stav (3));

dž) u roku od osam dana od dana prijema rješenja o ukidanju odobrenja za istraživanje eksplozivnih materija ne dostavi sve evidencije koje je vodilo prema ovom zakonu (član 45. stav (5));

e) ne podnese godišnji izvještaj o proizvedenim i prodatim, odnosno utrošenim i uništenim količinama eksplozivne materije najkasnije do 31. januara tekuće godine za prethodnu godinu (član 46. stav (1));

f) neuredno ili ne vodi evidenciju o proizvedenim eksplozivnim amterijama u skladu sa propisom iz člana **128.** ovog zakona (član 47.);

g) na oba primjerka rješenja o odobrenju nabavke eksplozivne materije ne naznači, pored vrste i količine prodate eksplozivne materije, i datum izdavanja tih materija, kao i oznake njihovih pakovanja (član 53.);

as) kantonalnom ministarstvu, prije upotrebe, a najkasnije u roku od 24 sata od dopremanja eksplozivne materije, ne prijavi vrstu i količinu tih eksplozivnih materija, navede dan, sat, način i svrhu dopreme, naziv organa koji je izdao odobrenje za njihovu nabavku, mjesto i način usklađivanja, odnosno držanja tih eksplozivnih materija, kao i vrijeme (dan, sat) i mjesto njihove upotrebe (član 54. stav 1);

h) ne obavijesti kantonalno ministarstvo najkasnije dva dana od dana određenog za uništenje tih materija, odnosno ambalaže, o mjestu, vremenu i načinu uništavanja neupotrijebljenih eksplozivnih materija i neupotrebljive ambalaže (član 62. stav (2));

i) u roku od osam dana od dana ne dostavi rješenja o ukidanju odobrenja za upotrebu eksplozivnih materija u toku ispitivanja kontrole kvaliteta proizvoda koji u sebi ne sadrže eksplozivne materije kantonalnom ministarstvu i ne dostavi evidencije koje je bilo obavezno voditi prema ovom zakonu (član 63. stav (6));

j) neuredno ili ne vodi evidenciju o nabavljenim, utrošenim, ustupljenim, uništenim ili nestalim eksplozivnim materijama (član 65.);

k) u roku od osam dana od dana prijema rješenja o ukidanju odobrenja za obavljanje poslova miniranja ne dostavi evidenciju kantonalnom ministarstvu (član 67. stav (7));

l) u toku obavljanja poslova miniranja ne poduzme sigurnosne mjere, uz obavljanje potrebnih mjerenja, radi utvrđivanja potencijalno štetnih uticaja miniranja na životnu sredinu (član 68. stav (1));

lj) nakon miniranja ne izradi izvještaj o miniranju (član 68. stav (1));

nj) plan miniranja i izvještaj o miniranju nije izradilo lice koje posjeduju odgovarajuću rješenje za miniranje (član 68. stav (2));

n) ako u toku miniranja koja se obavljaju u naseljenom mjestu ili u neposrednoj blizini naseljenog mjesta, najkasnije 24 sata prije obavljanja miniranja, ne obavijesti kantonalno ministarstvo i javnost putem lokalnih sredstava javnog saopćavanja (član 68. stav (3));

m) u roku od tri dana prije obavljanja miniranja u blizini cesta, željeznica, naftovoda, plinovoda, vodovoda, električnih ili telefonskih vodova i sličnih objekata pisano ne obavijesti pravna lica koja upravljaju navedenim građevinama (član 68. stav (3));

o) poslove pripreme miniranja i pomoćne poslove pri miniranju obavlja fizičko lice koje ne posjeduje završenu osnovnu školu, a koje je prethodno upoznato s opasnostima u toku rukovanju eksplozivnim materijama (član 70. stav (1));

p) lice koje obavlja poslove pripreme miniranja i pomoćne poslove miniranja nije pod nadzorom lica koje posjeduje rješenje za tu vrstu miniranja (član 70. stav (2));

r) kantonalno ministarstvo ne obavijesti o mjestu i vremenu upotrebe eksplozivnih materija na način kako je propisano u članu 72. stav (1) zakona;

s) neupotrijebljene eksplozivne materije nije vratilo u originalnoj ambalaži u skladište ili ih uništilo prema uputstvu proizvođača te uredno ne vodi evidenciju o uništenim količinama eksplozivnih materija (član 72. stav (2));

š) ne izvrši kategorizaciju pirotehničkih sredstava u skladu sa članom 73. stav (1) ovog zakona;

t) izvođenje javnog vatrometa obavlja lice koje nije stručno osposobljeno za izvođenje javnog vatrometa (član 85.);

u) izvođenje glasnog pucnja obavlja lice koje nije stručno osposobljeno za izvođenje glasnog pucnja (član 89.);

v) ne donese opći akt iz člana 91. ovog zakona;

z) ne drži količine eksplozivnih materija preko 20 kg u propisno izgrađenim skladištima, odnosno kontejnerima ili priručnim skladištima (član 94.);

ž) skladišta u kojima drži eksplozivne materije ne održava u skladu sa propisanim tehničkim normativima (član 95. stav (1));

q) skladišta u kojima su smještene eksplozivne materije ne osigurava od pristupa neovlašćenih lica u skladu sa projektovanim sigurnosnim mjerama i ako ključeve od magacina u kojima se drže eksplozivne materije ne čuva lice koja se brine o smještaju i izdavanju eksplozivnih materija (član 97.);

y) eksplozivne materije u količini do 2.000 kg, koje koriste za izvođenje radova, odnosno za obavljanje druge odgovarajuće djelatnosti, ne drži u kontejnerima ili privremenim skladištima (član 101.);

x) privremeno skladište nije postavljeno na mjesto koje je određeno u odobrenju kantonalnog ministarstva (član 102. stav (1));

w) na skladištima i objektima u kojima drži ili obavlja promet zapaljivih tečnosti i gasova, na vidnim mjestima, ne postavi natpise koji upozoravaju na zabrane iz stava (1) člana 110. ovog zakona, oznake opasnosti od eksplozija, izbijanja i širenja požara i uputstvo o postupanjima u slučaju eksplozija i požara (član 110. stav (2));

aa) nacрте planskih dokumenta za skladišta i objekte u kojima se obavlja promet zapaljivih tečnosti i gasova ne dostavi na mišljenje Federalnom ministarstvu, odnosno kantonalnom ministarstvu (član 111.);

ab) prilikom izgradnje ili rekonstrukcije objekata za skladištenje i promet zapaljivih tečnosti i gasova nije pribavljena saglasnost kantonalnog ministarstva u pogledu zaštite od eksplozija te izbijanja i širenja požara (član 112.);

ac) objekti za skladištenje i promet zapaljivih tečnosti i gasova nemaju prirodno provjetravanje, a po potrebi i vještačko (član 115. stav (1));

ać) otvori za provjetravanje objekata za skladištenje i promet zapaljivih tečnosti i gasova nisu izgrađeni tako da kroz njih ne može da prodre voda i da se ne mogu sami zatvoriti ili začepiti (član 115. stav (2));

ač) prije stavljanja u promet zapaljivih tečnosti ne utvrdi grupu zapaljive tečnosti prema temperaturi zapaljivosti, kategoriji i stepenu opasnosti od eksplozija i izbijanja i širenja požara u skladu sa tehničkim propisima iz člana 106. stav (3) ovog zakona i ako ne izradi uputstvo za sigurno skladištenje, držanje i promet zapaljivih tečnosti (član 188. stav (1));

ad) na rezervoarima, posudama, bocama ili bočicama koji sadrže zapaljive tečnosti, prilikom stavljanja u promet, ne budu ispisani podaci o vrsti i zapremini zapaljive tečnosti, nazivu proizvođača ili distributera, grupa zapaljive tečnosti prema temperaturi zapaljivosti, kategoriji i stepenu opasnosti od eksplozija te izbijanja i širenja požara, na kvalitetno odštampanoj i vidno zalijepljenoj naljepnici ili odštampani na samom rezervoaru, posudama, boci ili bočici (član 118. stav (2));

ae) rezervoari, posude, boce i bočice koji služe za držanje zapaljive tečnosti nisu izrađeni od materijala otpornog na tečnost koju sadrže, označeni jasnim znacima opasnosti od eksplozija, izbijanja i širenja požara i tekstom upozorenja za sigurno držanje i upotrebu (član 119.);

af) nemaju podatke o grupi zapaljive tečnosti prema temperaturi zapaljivosti, kategoriji i stepenu opasnosti od eksplozija i izbijanja i širenja požara (član 120.);

ag) ne posjeduje uvjerenje o ispravnosti i nepropustljivosti ispitane instalacije za gas (član 123. stav (5)).

Za prekršaje iz stava 1. ovog člana, kaznit će se i odgovorno lice u pravnom licu novčanom kaznom u iznosu od 100,00 do 1.500,00 KM.

Član 142.

Novčanom kaznom u iznosu od 100,00 KM do 3.000,00 KM kaznit će se za prekršaj odgovorno lice u pravnom licu ako:

a) u objektu u kojem se obavlja prodaja eksplozivne materije izdaje eksplozivnu materije licu na koje odobrenje ne glasi, odnosno ne izda licu koje je u odobrenju za nabavku za to izričito ovlašteno (član 55. stav (1));

b) prije izdavanja eksplozivne materije u objektu u kojem se obavlja prodaja eksplozivne materije ne utvrdi identitet lica koje traži da mu se ta materija izdaje (član 55. stav (1));

c) izda eksplozivne materije licu za koje se osnovano može zaključiti da je pod utjecajem alkohola ili da su nastupile druge okolnosti koje ga čine nepodobnim za preuzimanje eksploziva (član 55. stav (2)).

Član 143.

Novčanom kaznom u iznosu od 200,00 KM do 1.500,00 KM kaznit će se za prekršaj fizičko lice ako:

a) proizvodi i stavlja u promet eksplozivne materije (član 36.);

b) upotrebljava eksplozivne materije (član 54. stav (3));

c) poslove miniranja obavlja bez rješenja iz člana 69. ovog zakona;

ć) upotrebljava pirotehnička sredstva razreda II i III u zatvorenim prostorijama, na prostorima gdje se okuplja veći broj lica (član 77. stav (1));

č) prepravlja pirotehničkih sredstva radi povećanja učinka i njihove upotrebe u drugim predmetima ili vrši vlastitu izradu pirotehničkih proizvoda i smjesa (član 77.

stav (2));

d) obavlja izvođenje javnog vatrometa i glasnog pucnja.

IX - PRELAZNE I ZAVRŠNE ODREDBE

Član 144.

Pravno lice koje se bavi proizvodnjom i prometom eksplozivnih materija ili koje u obavljanju svoje djelatnosti drži ili upotrebljava eksplozivne materije dužno je uskladiti svoj rad s ovim zakonom u roku od šest mjeseci od dana stupanja na snagu Zakona.

Pravno lice iz stava 1. ovog člana dužno je donijeti odgovarajuće akte u roku od šest mjeseci od dana stupanja na snagu ovog zakona.

Član 145.

Vlada Federacije Bosne i Hercegovine donijet će propis o zaštiti na radu pri proizvodnji i rukovanju eksplozivnih materija na prijedlog federalnog ministra energije, rudarstva i industrije i federalnog ministra unutrašnjih poslova u roku od šest mjeseci od dana stupanja na snagu ovog zakona.

Član 146.

Federalni ministar će donijeti slijedeće propise i to:

a) o uvjetima u pogledu stručne spreme koja je potrebna za lica koja rukuju eksplozivnim materijama, zapaljivim tečnostima, način i postupak provjere stručnog znanja za ta lica u obavljanju poslova proizvodnje, ispitivanja, prometa, utovara i istovara, uskladištenja, čuvanja, nabavke i prodaje (član 13. stav (3));

b) o kriterijima vezano za zdravstvenu sposobnost za lica koja rukuju eksplozivnim materijama, zapaljivim tečnostima i gasovima u saradnji sa federalnim ministrom zdravstva (član 13. stav (4));

c) sadržaj stručnog ispita za odgovorno lice i način i postupak polaganja tog ispita (član 31. stav (5));

d) o načinu i postupku označavanja eksplozivne materije (član 14. stav (4));

e) o tehničkim zahtjevima i postupku za ocjenjivanje usaglašenosti eksplozivnih materija (član 32. stav (3));

f) o uvjetima koje moraju ispunjavati poslovne prostorije i objekti za skladištenje eksplozivnih materija (član 37. stav (5));

g) sadržaj plana miniranja i izvještaj o miniranju, obrazac potvrde iz člana 61. ovog zakona i minerske knjižice (član 68. stav (4));

i) sigurnosne zahtjeve i uvjete koje treba da ispunjavaju pirotehnička sredstva (73. stav (2));

j) o uvjetima koje treba da ispunjavaju objekti u kojima se obavlja prodaja i držanje pirotehničkih sredstava (član 81.);

k) način obavljanja javnog vatrometa, program stručnog osposobljavanja te postupak provođenja stručnog ispita za lica koje izvodi javni vatromet, oblik i sadržaj odobrenja za izvođenje javnog vatrometa, o tehničkim i sigurnosnim zahtjevima

vezano za mjesta ispaljivanja, sredstvima za ispaljivanje i drugim zahtjevima potrebnim za izvođenje javnog vatrometa (član 86.);

l) uvjete i način provođenja sigurnosnih mjera kod skladištenja eksplozivnih materija (član 105.);

lj) uvjete i mjere zaštite od požara i eksplozija prilikom izgradnje građevina i postrojenja te skladištenja, držanja i prometa ukapljenog naftnog gasa (član 125.);

nj) sadržaj, izgled i način vođenja evidencija (član 131.);

n) sadržaj i način obavljanja poslova inspekcijskog nadzora (član 138.).

Federalni ministar dužan je u roku od šest mjeseci od dana stupanja na snagu ovog zakona donijeti propise za iz stava (1) ovog člana, za čije je donošenje ovlašćen ovim zakonom.

Član 147.

Propisi o eksplozivnim materijama za upotrebu u privredi koji su u primjeni na dan stupanja na snagu ovog zakona ostaju na snazi do donošenja provedbenih propisa na osnovu ovlasti iz ovog zakona, ukoliko nisu u suprotnosti s odredbama ovog zakona.

Član 148.

Danom stupanja na snagu ovog zakona prestaju važiti odredbe zakona koji se primjenjuju u Federaciji Bosne i Hercegovine, kojima je uređena oblast proizvodnje, prometa i upotrebe eksplozivnih materija koje su predmet ovog zakona.

Član 149.

Ovaj zakon stupa na snagu osmog dana od dana objavljivanja u «Službenim novinama Federacije BiH».

OBRAZLOŽENJE

I - USTAVNI OSNOV ZA DONOŠENJE ZAKONA

Ustavni osnov za donošenje Zakona o prometu eksplozivnih materija, zapaljivih tečnosti i gasova sadržan je u odredbi člana IV A. 20. (1) d) Ustava Federacije Bosne i Hercegovine, u kojoj je propisano da je Parlament Federacije nadležan za donošenje zakona o obnašanju dužnosti federalne vlasti. S obzirom na to da se Zakonom o prometu eksplozivnih materija, zapaljivih tečnosti i gasova uređuje pitanje prometa, proizvodnje, upotrebe i nabavke eksplozivnih materija, zapaljivih tečnosti i gasova koje nepravilnim rukovanjem i njihovom zloupotrebom mogu u značajnoj mjeri uticati na zaštitu čovjekove okoline te da se eksplozivne materije i zapaljive tečnosti koriste u eksploataciji prirodnog bogatstva, to bi, u vezi sa članom III. 2. c) i h) Ustava Federacije Bosne i Hercegovine, kojima je propisano da su federalna vlast i kantoni nadležni za politiku zaštite čovjekove okoline i korištenja prirodnog bogatstva, navedena ustavna odredba mogla biti osnov za donošenje Zakona o prometu eksplozivnih materija, zapaljivih tečnosti i gasova.

II - RAZLOZI ZA DONOŠENJE ZAKONA

Zakonom o unutrašnjim poslovima Federacije BiH propisano je da do donošenja odgovarajućih zakona i drugih propisa o prevozu opasnih materija i propisa o eksplozivnim materijama za potrebe privrede, Federalno ministarstvo će obavljati poslove koji se odnose na odobravanje proizvodnje eksplozivnih materija tipa ANFO na mjestu upotrebe, odobravanje prometa eksplozivnih materija za upotrebu u privredi i odobravati stavljanje u promet i upotrebu eksplozivnih materija na području Federacije.

Imajući u vidu da Zakonom o prometu eksplozivnih materija i zapaljivih tečnosti i gasova („Službeni list SRBiH“, br. 39/89, 36/90) koji se primjenjuje kod rješavanja pitanja u vezi s prometom i proizvodnjom eksplozivnih materija, zapaljivih tečnosti i gasova nisu obuhvaćena pojedina pitanja koja se odnose na upotrebu pirotehničkih sredstava, javni vatromet i glasno pucanje, potrebno je da i ova pitanja zakonski uredi Parlament Federacije BiH.

Također je potrebno ovu oblast uskladiti sa nizom direktiva Evropske unije donesene 2014. i 2015. godine, a odnose se na eksplozivne materije i pirotehnička sredstva.

Donošenje ovog zakona vezano je za Akcioni plan za realizaciju 14 ključnih prioriteta iz Mišljenja Evropske komisije.

III - OBRAZLOŽENJE PREDLOŽENIH RJEŠENJA

Zakonom o prometu eksplozivnih materija, zapaljivih tečnosti i gasova uređuje se pitanje prometa, proizvodnje, upotrebe eksplozivnih materija zapaljivih tečnosti i gasova.

Radi regulisanja gore navedene materije te jasnijeg pregleda zakona i lakšeg snalaženja u njegovoj primjeni, Zakon je podijeljen na poglavlja: I - Opće odredbe, II - Zajedničke odredbe, III - Nadležnost u provođenju poslova koji se odnose na

eksplozivne materije, zapaljive tečnosti i gasove, IV - Eksplozivne materije, V - Zapaljive tečnosti i gasovi, VI - Evidencije i izvještavanja, VII - Kaznene odredbe i VIII - Prelazne i završne odredbe.

IV - USKLAĐENOST PROPISA S EVROPSKIM ZAKONODAVSTVOM

Federalno ministarstvo unutrašnjih poslova je utvrdilo da postoji primarni izvor iz prava Evropske unije koji na poseban način reguliše pitanja koja su regulisana navedenim zakonom i to:

DIREKTIVA 2014/34/EU EUROPSKOG PARLAMENTA I VIJEĆA od 26. veljače 2014. o usklađivanju zakonodavstava država članica u odnosu na opremu i zaštitne sustave namijenjene za uporabu u potencijalno eksplozivnim atmosferama (preinačeno).

DIREKTIVA 2012/18/EU EUROPSKOG PARLAMENTA I VIJEĆA od 4. srpnja 2012. o kontroli opasnosti od velikih nesreća koje uključuju opasne tvari, o izmjeni i kasnijem stavljanju izvan snage Direktive Vijeća 96/82/EZ

DIREKTIVA 2013/29/EU EUROPSKOG PARLAMENTA I VIJEĆA od 12. lipnja 2013. o usklađivanju zakonodavstava država članica u odnosu na stavljanje na raspolaganje pirotehničkih sredstava na tržište (preinaka)

DIREKTIVA 2014/28/EU EUROPSKOG PARLAMENTA I VIJEĆA od 26. veljače 2014. o usklađivanju zakonodavstava država članica u odnosu na stavljanje na raspolaganje eksploziva za civilnu upotrebu na tržištu i nadzoru nad njima (preinačena)

Direktiva Vijeća 91/477/EEZ od 18. lipnja 1991. o nadzoru nabave i posjedovanja oružja (SL L 256, 13. 9. 1991.), kako je izmijenjena Direktivom 2008/51/EZ Europskog parlamenta i Vijeća od 21. svibnja 2008. o izmjeni Direktive Vijeća 91/477/EEZ o nadzoru nabave i posjedovanja oružja (SL L 179, 8. 7. 2008.)

– Direktiva Komisije 2008/43/EZ od 4. travnja 2008. o uspostavljanju sustava za identifikaciju i sljedivost eksploziva za civilnu uporabu u skladu s Direktivom Vijeća 93/15/EEZ (Tekst značajan za EGP) (SL L 94, 5. 4. 2008.), kako je izmijenjena Direktivom Komisije 2012/4/EU od 22. veljače 2012. o izmjeni Direktive 2008/43/EZ o uspostavljanju sustava za identifikaciju i sljedivost eksploziva za gospodarsku uporabu u skladu s Direktivom Vijeća 93/15/EEZ (tekst značajan za EGP) (SL L 50, 23. 2. 2012.)

– Direktiva 2013/29/EU Europskog parlamenta i Vijeća od 12. lipnja 2013. o usklađivanju zakonodavstava država članica u odnosu na stavljanje na raspolaganje pirotehničkih sredstava na tržište (preinaka) (Tekst značajan za EGP) (SL L 178, 28. 6. 2013.)

– Direktiva 2014/28/EU Europskog parlamenta i Vijeća od 26. veljače 2014. o usklađivanju zakonodavstava država članica u odnosu na stavljanje na raspolaganje eksploziva za civilnu uporabu na tržištu i nadzor nad njima (preinaka) (Tekst značajan za EGP) (SL L 96, 29. 3. 2014.).

(3) Ovaj Zakon notificiran je u skladu s Direktivom (EU) 2015/1535 Europskog parlamenta i Vijeća od 9. rujna 2015. o utvrđivanju postupka pružanja informacija u

području tehničkih propisa i pravila o uslugama informacijskog društva (Tekst značajan za EGP) (SL L 241, 17. 9. 2015.) pod brojem 2015/392/HR.

V - PROVEDBENI MEHANIZMI I NAČIN OSIGURANJA POŠTIVANJA PROPISA

VI - OPIS KONSULTACIJA VOĐENIH U PROCESU IZRADE PROPISA

U skladu sa članom 11. Uredbe o pravilima za učešće zainteresovane javnosti u postupku pripreme federalnih pravnih propisa i drugih akata („Službene novine Federacije BiH“, broj 51/12) i članom 6. Pravilnika o proceduri za izradu izjave o fiskalnoj procjeni zakona, drugih propisa i akata planiranja za budžet („Službene novine Federacije BiH“, broj 34/16) vrše se konsultacije.

VII - FINANSIJSKA SREDSTVA